

NAMUNTLHA TSALWA

LERI RI HETISEKILE



Ha ha yimisile xisweswo, loko mi swikota, hi ri karhi hi korhamisa tinhloko ta hina hi khongela.

² Tatana wa hina wale Matilweni, hi tsakile madyambu lawa ha leswi, nkatoko wun'wana wo tisa ku kwetsima loku, Evhangelu yo saseka ya Yesu Kreste. Ha Ku khensa hikuva wa ha ri yena tolo, namuntlha, ni hilaha ku nga heriki. Ha Ku khensa hi ntshungu lowu nga hlengeletana laha ehandle hi nkarhi wa maxele yo titimela swonghasi, kambe va ri niku langutela lokukulu, va langutela, niku tshembha leswaku xin'wana lexi hlamarisaka xi ta humelela hi le ka Xikwembu. Hi ta hi ri niku tshembha loku, Hosi, eka nhlengeletano yin'wana na yin'wana. Ha Ku khensa hi tinhlengeletano leti hi veke na tona, madyambu ya tolweni, etabernakeleni; ha Ku khensa eka nhlengeletano ya tolo ni madyambu, ni nhlengeletano ya namuntlha, etabernakeleni. Hi langutele leswi U nga hi khomela swona madyambu lawa.

³ Tatana, ha swi tiva leswaku un'wana ni un'wana loyi a nga ni mavoko a nga swikota ku phendla mapapila ya Bibe, kambe ku na Un'we ntsena Loyi a nga yi endlaka leswaku Yi va ni vutomi ni ntiyiso, ku nga Wena. Swingaleswi, Tatana, hi langutele leswaku U hi endlala swona madyambu lawa. Hi katekisi hi ndlela yin'wana ni yin'wana. Timbilu ta hina ti tele ntsako loko hi vona nkarhi wu tshinelela wo hlangana na Yena, ngohe hi ngohe, loyi hi N'wi rhandzeke hi tlhela hi n'wi hanyela hi malembe layo tala.

⁴ Vahundzuki lavotala, Hosi, va swi endlile. Hi ku twisisa leswaku muendzeriwa lonkulu, wa mune wa makume kumbe ntlhanu wa makume, u fanelo ku khuvuriwa hi Vito ra Wena, emixweni, kusuka eka xikhongelo xa madyambu ya tolo. O Xikwembu, hakombela yana emahlweni, ha khongela, ku fikela laha Mbewu ya Xikwembu hinkwayo ya vahlawuriwa yi vona ku Vonakala ka Evhangelu, kutani yi nghena tshangeni.

⁵ Ha Ku kombela leswaku u hi tumbeta eRitweni madyambu lawa; hi pfali mahlo eka swilo swa misava, kutani u hi endla hi vona Yesu. Leswaku lahaya ku nga hava ni ntokoto wa Ntshava ya Nkwetsimo eka hina, madyambu lawa, leswaku hi nga voni munhu la ponisaka handle ka Yesu ntsena. Ha swi kombela hi Vito ra Yena, ni hi ku kwetsima ka Yena ni hi ku vonakarisiwa ka Evhangelu ya Yena. Amen.

Mi nga tshama ehansi.

⁶ Ndzi ta hundzuluxa xitlakusa-marito lexi, kumbe tafula leri, etlhelo swintsongo nyana, loko swi ri kahle, leswaku ndzi ta kota ku vona matlhelo hinkwawo ya va yingiseri. Xo antswa ndzi nga ha hundzuluxa switlakusa-marito leswi swi nga lahawani. Swi kahle, ntsena xinkadyana.

⁷ Ha mi xeweta, eka oditoriyamu leyikulu madyambu lawa, vanghana va hina eArizona, California, Texas, niku tsemekanya hile United States, hi ndlela ya riqhingho. Leyi, leyi yi twala tiko hinkwaro, xikhongelo lexi madyambu lawa, hi ndlela ya riqhingho, swingaleswi hi tshembha leswaku Xikwembu xi ta hi katekisa.

⁸ Xana ma swi twa, kwale ndzhaku ka—ka oditoriyamu hi tlhelo ra ximatsi xana? Hi swona, va ta ya va ya kamba tintambhu ta riqhingho, ku vona loko ti tirha kahle.

⁹ Xana un'wana na un'wana u tsakile madyambu lawa xana? [Nhlengeletano yi ku, "Amen."—Muhleri.] Mi nge, swi kahle! Eka tlhelo leri ke? ["Amen."] Amen. Ndzi tsakile ku vona mi tshamisekile kahle hinkwerhu.

¹⁰ Kutani mundzuku ni madyambu, loko mi vona hlayo yi ya yi andza, kutava nakambe ni ku kongomisa ka riqhingho. Ri kona ni madyambu lawa. Ndzi ehleketa leswaku tin'wana ti boheleriwile etabernakeleni.

¹¹ Kutani, mundzuku ni mixo, nhlengeletano a yi nge khomeriwi kona etabernakeleni, hikuva...ku tava ni lava va swiluva lavo sasekisa muako wa kereke va lunghisela nkhuvo wo tekana mundzuku ni ndzhengha. Va rhurhisile xikhongelo xa—xa kereke, ni mixo, kuya eka kereke ya Makwerhu Ruddell, un'wana wa vatrhisani kulobye wa hina, leyi nga eka—eka patu rale henhla lahawani, makume ntsevu-mbirhi. A swi tivisiwile leswi? [Makwerhu Neville a ku, "Ina."—Muhleri.] Swi tivisiwile. Kutani, loko yi tala swinene na yona, hi ta teka van'wana ni mufundhisi hi va yisa ekerekeni ya Makwerhu Junior Jackson, ehansi eClarksville. Xikongomelo xa ku ya eka Makwerhu Ruddell, hi leswi ku nga ekusuhi lahawani, naswona swa—naswona swa olova ku fika kona. Kutani hi ta tihlayisa hi ndlela yin'wana. Mi va ni ntiyiso wa ku lulamisa lava lavaka ku khuvuriwa mundzuku, ndza tshembha ku ta engeteleka dzana kumbe madzana mambirhi ya vanhu eka nkhuvo wa mundzuku. Kutani madyambu ya mundzuku...

¹² A ndzi rhandzi ku tivisa swilo leswi ni vulavulaka hi swona nkarhi wu nga si fika, kambe madyambu man'wana exikhongelweni, kumbe siku rin'we, ndzi lava ku vulavula hi nhloko mhaka leyi nge: *Xana I Mani Melkesedeke Loyi?* Hikuva, i dyondzo leyi a—a ndzi vona leswaku hi hanya eminkarhini wa nhlavutelo lowu, lowu wu ve xivutiso eka malembe yo tala, ku, "Xana i mani Nakulorhi loyi?" Ndza

tshembha leswaku Xikwembu xi na nhlamulo, A ri Mani. Van'wana va ku, "a ri muprista," van'wana va ku, "a ri hosi," van'wana . . . Kambe ku fanele ku va . . .

¹³ Tani hiloko xi ve xivutiso, ku fanele ku va ni nhlamulo ya xivutiso lexi, lexi nga ntiyiso. Ku ngaka ku ngavi na xivutiso ku ri hava nhlamulo.

¹⁴ Sweswi, hi tshembha leswaku Xikwembu xi ta hi katekisa madyambu ya namuntlha eka Rito ra Xona, loko haha Ri hlaya.

¹⁵ Xana a mi swi twile. . . Billy u ndzi byerile leswaku ku vile ni ntirhisano lowunene exikarhi ka vanhu va lahawani hi tlhelo ra mapakelo, maphorisa ni hinkwaswo. Khomisani sweswo; swi lulamile, swikahle swinene.

¹⁶ Hi rhandza ku vona nkarhi, kumbexani ku nga ri khale, loko hi ta tisa tende laha dorobeni leri hi ta ri veka erivaleni ra bolo, laha ri nga tshamaka nkarhi wo leha, kumbexani kuringana ku endla mavhiki manharhu kumbe mune, ya mpfuxelelo, hi tshamile. Sweswi hi hlangana xinkadyana hi nga se tivana, hi tlhela hi lelana nakambe hi hambana hi ntlhela hi famba. Kambe ndzi lava ku ta endzela nkarhi wo leha, nkarhi lowu hi nga taka hi nga boheki ku pfala ntirho endzhaku ka vusiku kumbe byi mbirhi, kambe hi tshama hi dyondza, nhlikanhi ni vusiku, nhlikanhi ni vusiku, kuya emahlweni nile mahlweni. Kumbexani un'wana a nga kota ku ya nyika tihuku swakudya ekaya, ni ku senga tihomu, kutani mi tlhela mi vuya vhiki leri landzelaka kutani mi ya emahlweni ni xikhongelo. Ndza—ndza swi tsakela sweswo. Hosi yi va na n'wina.

¹⁷ Sweswi, ndzi nga se famba, kumbexani hi Sonto ni mixo kumbe hi Sonto ni madyambu, kumbe nkarhi wun'wana, xin'wana xa swikhongelo leswi, ndza swi tiva leswaku hinkwerhu mi rhandza ku twa Ntiyiso wa Hungu ra *Vukati Niku Thalana*, laha ku nga xiphiquho lexikulu swinene eminkarhini ya namuntlha. Ndzi ni ntiyiso ntsena tani hilaha ndzi nga yima kwalahawani, ndzi pfumela leswaku nhlamulo leyinene yi le Ritweni ra Xikwembu, ndza pfumela leswaku na mi tshembhisa leswaku hi leswi ndzi nga ta vuyela swona.

¹⁸ Ndzi ehleketa leswaku, hi ku tiva, tani hilaha ndzi swi tivisaka xiswona, ndzi lava ku khoma nhlengeletano yin'wana lahawani eJeffersonville, hi Sonto ya Paseka, kutani ke. . . ya xikhongelo xa ku huma ka dyambu, kutani hi Sonto ya Paseka. Hi ta switivisa kahari na nkarhi ni ku ringeta ku kuma oditoriyamu, loko swi nga koteka, kumbe kun'wana, swa Sonto, kumbe hi ta hi Muqhivela na Sonto. Ndzi ta haha ndzi ta ndzi tlhela ndzi tlhela, hikuva swi le kusuhi na nkarhi. . . ndzi fanele ku swi langutisisa, kusungula, na xedulu leyi ni nga na yona, rin'wana ra—ra—ra patu ra mina rale California. Kutani

swingaleswi, xikan'wekan'we endzhaku ka sweswo, ndzi ta fanela ku ya e—e Afrika. Swingaleswi tihlanganiseni na hina kutani mi hi khongelela.

¹⁹ Sweswi, madyambu lawa, ndzi lava leswaku hi languta eka xiphemu xa Rito ra Xikwembu, lexi kumekaka eka kuavanyisa ka vu4 ka Mukwetsimi Luka. Kuavanyisa ka vu4 ndzimana ya vu16, yi sungula, hi Yesu loko a vulavula.

...*Namuntlha Rito leri ri hetisekile tindleveni ta n'wina.*

²⁰ Sweswi hi lava ku pfapfarhuta, kusuka eka Sweswo, makumu lawa ya kombaka ndlela leyi Rito ra Xikwembu ri nga kurisa xiswona! Sweswi, hinkwerhu hi nga ha pimanyeta hi vona matimba ya rona, kambe swi teka Vukulu ku Ri endla leswaku ri tirha.

²¹ Hi nga ha pimanyeta ni matirhele ya muchini, movha, swi teka vukulu bya matirhele ya yona kuva mavhilwa ya tirha ni ku famba.

²² Sweswi, Yesu a tlhelerile e—e Nazareta, laha A kuleleke kona. Loko hi ya emahlweni ni Matsalwa lawa, hi kuma leswaku va teri, “Hi swi twile leswaku U endlile *swokarhi-na-swokarhi* eKapernawume. Sweswi a hi tsakela kuva hi ku vona U swi endla etikweni ra Leri ri nga ra ka N'wina.”

²³ Yesu a ku, “Muprofeta a—a nga ndzuniwe etikweni ra ka vona.” Kutani, xivangelo, hilaha u nga kulela kona, laha vanhu va ku tivaka. Kutani kwalahaya U vile na—na—na vito ro biha, ku sungula hi swona, laha A velekiweke a ri hava tatana wa laha misaveni. A va N'wi vitana “n'wana la nga hungukiwa,” laha Maria a nga tika a nga se tekiwa, ximfumu, hi Yosefa. Kambe, sweswo a hi swona, ha swi tiva leswaku a hi swona.

²⁴ Kutani eka Tsalwa leri, lexi kokeke mahlo ya mina leswaku ya wela eka rona, hi swin'wana swa leswi swi nga humelela ku nga ri khale ePhoenix, Arizona. A kuri siku ro hetelela, ra nhlengeletano leyi a ndzi fanele ku vulavula eka International Convention ya Full Gospel Business Men.

²⁵ Kutani eka khonivhexini leyi a hi ri ni muendzi, loyi a ri bishopo wa Khatholiki, laha ku nga—nga un'wana “wa Chaldean Rites ya kereke ya Apostolic Catholic; yena Muchaviseki Muf. John S. Stanley, O.S.D.” Hi yena “mubishopo-nkulu wa le madorobeni ya United States,” eka kereke ya Khatholiki. *Leri* a ri ri khadi ra yena na—na adirese ya yena.

²⁶ Kutani a ri muendzi ni ma Christian Business Men, kutani ndzi n'wi vonile kwalahaya, hi xa tolo xa kona. Loko ndzi ri karhi ndzi vulavula hi Muqhivela ni madyambu, ndza pfumela leswaku a wu ri wona, kumbe hi Muqhivela ni mixo loko hi ri eku fihluleni, kutani ndzi...Loko ndza ha ri eku vulavuleni,

a tshamela ro ndzi langutisa. Ndzi ehleketa, “Wanuna ya loye hakunene a nga yimi na swona hinkwaswo leswi ndzi swi vulaka.” Kutani, maswitiva, mi nga—mi nga ha n’wi vona; a tshamela ro yisa nhloko ya yena ehenhla ni le hansi, kambe a ndzi switivanga leswi hakunene a swi humelela eka yena.

²⁷ Swingaleswi hi Sonto ni ndzhengha, loko ndzi tlakuka ndzi ya eku vulavuleni, a ndzi ya ekutekeni ka tsalwa ra *Swithavi Swa Mbeleko*, laha Yesu a nge teri, leswaku, “Tani hi wansati loyi a nga eku xanisekeni hi n’wana,” u le ku xanisekeni hi ku tswala. Kutani swingaleswi a ndzi ya eku vulavuleni kusuka kwalaho, tani hi, *Swithavi Swa Mbeleko*, nhloko-mhaka, leswi vulaka leswaku misava yile ka swithavi swa mbeleko sweswi. Swa khale swi fanele kuva ku hundziwile eka swona, leswaku leswi ntshwa swi fanele ku velekiwa; ku fana ni—ni mbewu leyi yi fanelaka ku bola, leswaku yi ta kota ku nyika vutomi lebyintshwa.

²⁸ Ni hilaha swithavi, swithavi swa mbeleko swi hlaseleke misava! Enkarhini wa Nyimpi ya Misava yo Sungula, yi vile niku vaviseka lokukulu, hikuva a va ri na phoyizeni ya gese, ni swin’wana, leswi a swi ta kota ku herisa misava hinkwayo. Kutani eka Nyimpi ya Misava ya Vumbirhi, yi hlaseriwe nakambe, hi ku vaviseka lokukulu; a va ri ni swimbindzumuxa miako, nakambe na tibomo ta athomiki. Yi nge he swikoti ku yimela swithavi swin’wana swa mbeleko. Na timizali leti ni swin’wana namuntlha, yin’wana nyimpi nakambe leyi yi nga ta landzela yi ta yi hoxa exibakabakeni, hikuva yi tava yi tswarile sweswi. Nakona ku tava ni misava leyintshwa. Biblele yi vula leswaku yi ta va kona.

²⁹ Ehansi ka Hungu ra muprofeta un’wana ni un’wana, Israel ri vile ni swithavi swa mbeleko, hikuva vaprofeza lava a va ta eka mbono endzhaku ka loko va ntivo-vukhongeri ni vafundhisi va vile ni kereke leyi yi nga eka xivumbeko xa nhlango. Kutani loko vaprofeza va vona va ta eka mbono ni LESWI HOSI YI SWI VULAKA, va ninginisile tikereke ta vona, kutani yi va ni swithavi swa mbeleko. Ekuheteleleni, u vile ni swithavi swa mbeleko ku kondza swi nemebelela ehenhla kufikela laha a tswalaka N’wana wa Evhangel, laha ku nga Rito hi Roxe ri nga endliwa nyama.

³⁰ Swingaleswi kereke hakunene madyambu lawa yile ka swithavi swa mbeleko, nakambe, ka ku tswala N’wana, N’wana wa Xikwembu loyi a faneleke ku vuya nakambe. Hinkwavo va ntivo-vukhongeri, ni hinkwavo mafambiselo ya hina, ni tidinominexini ta hina hinkwato, ti hi bolele ehansi ka milenge ya hina. Hikwalaho hi le ka swithavi swa mbeleko, kutani Hungu leri humaka eka Xikwembu hi minkarhi hinkwayo ri hoxa kereke eka swithavi swo tika, kambe endzhaku nyana yi ta veleka Mutekiwa. Loyi a nga ta tisa Yesu Kreste eka Mutekiwa wa Yena.

³¹ Kutani, loko, ndza ha ri karhi ndzi anakanya leswaku wanuna loyi u kanetana na mina hi xitalo. Loko ndzi yima ku ya vulavula hi Hungu leri, ndzi phendlile Bibebe ya mina, ku ya kuma pheji.

³² Kutani nsati wa mina a ha ku ndzi nyika Bibebe yintshwa, yi ri ya Khisimusi. Bibebe ya mina a yiri ni kwalomu ka khume ntlhanu wa malembe hi vukhale, a yi handzulelekile swinene. Mapapila, minkarhi hinkwayo loko ndzi yi pfula, a ya ntlurhuka kunene eka yona. Kutani, kambe a ndzi swi tiva laha a ndzi fanele ku kuma kona Matsalwa, swingaleswi ndzi dyondze swinene hi Bibebe ya leyo. Kutani ndzi teke leyintshwa, hikuva leyin'wana a yi languteka yi hlakarile, ku famba na yona ekerekeni.

³³ Loko ndzi tava ndzi sungurile ku yi pfula eka Mukwetsimi Yohana, laha Matsalwa ya nga kumeka kona, ndzi sungule ku hlaya eka ku avanyisa ka vu16, kambe vhesa leyi a ndzi yi lava a yi nga ri kona lahaya. Hiloko ndzi ehleketa, "Swa chavisa!" Ndzi tlhele ndzi pfula nakambe; a swa ha fana a yi ngari kona kwalahaya.

³⁴ Kutani Makwerhu Jack Moore, wa le Shreveport, Louisiana, munghana wa mina wa xiviri, a tshamile kwalahayani. Ndzi ku, "Makwerhu Jack, xana a yi kumeki eka Yohana 16 xana?"

A ku, "Ina."

³⁵ Kutani mufundhisi loyi wa Mukhatholiki a tlakuka exitulwini xa yena a yima, kusuka exikarhi ka vafundhisi vo tlula dzana lava tshameke eka platifomo; a ta ekusuhi na mina, a havaxerile minkhancu na magaweni na swihambano, na swin'wana na swin'wana, a tshinelela ekusuhi swinene na mina. Kutani a ku, "Jaha ra mina, tiya. Xikwembu xi lava ku famba famba."

Ndzi ehleketa, "Mubishopo wa Mukhatholiki a ndzi byela leswi?"

A ku, "Hlaya laha eBukwini ya mina."

³⁶ Kutani ndzi hlaya Matsalwa kusuka eBukwini ya yena, kutani ndzi teka dyondzo ndzi ya emahlweni, ndzi chumayela nchumayelo wa mina.

³⁷ Endzhaku ka swona, loko ndzi hetile, a suka a yima endzhaku ka loko ndzi fambile, kutani a ku, "Ku ni xilo xin'we lexi nga ta humelela. Endzhaku ka swona, kereke yi fanele ku huma eka thyaka leri yi nga eka rona, kumbe hina hi huma eka thyaka leri kereke yi nga eka rona." Swingaleswi, xin'we xa leswimbirhi.

³⁸ Kutani loko ndzi ri erendzweni ra ku tlhelela ekaya, ehansi eTucson, madyambu yalawa. Vana a va rilela tisangweji, kutani ndzi yimile ku va kumela tisangweji eximaketanini.

Kutani nsati wa mina a ku, “Bill, a ndzi si tshama ndzi chuwhisa leswi evuton’wini bya mina, loko ndzi ku vona u ri karhi u kayakaya hi Bibe le yaleyo.” A ku, “Xana a swi nga ku chuwhisanga xana?”

³⁹ Ndzi ku, “Na swintsongo.” Ndzi ku, “Ndzi swi tivile leswaku swi kona kun’wana kwalahaya endzeni. Va loka va nga hoxanga peji rin’wana. I xihoxo xa nkandziyiso.”

⁴⁰ Kutani yena a ku, “Loko ndzi ehleketa, leswaku u xavele hi mina Bibe le y! A swi vonaka wonge mahlo hinkwawo ya le henhla ka mina.”

⁴¹ Kutani ndzi ku, “Kunene, a wu nga ta endla nchumu. Lexi i xihoxo xa vakandziyisi va Bibe le.” Ndzi ku, “Ntsena va loka va nga hoxi tluka rin’wana.”

⁴² Kunene, ndzi tlhele ndzi ya yi langutisisa nakambe, ntsena hi ku hetiseka hilaha ku nga va ka hakona; kambe mahetelelo ya kuavanyisa ka vu16, xiphemu xa yona, xiphemu xa yona ku ringana tiinci tinharhu kusuka ehansi, kusuka ehansi kuya eka kuavanyisa ka vu17 hi tlhelo lerin’wana, a swi fana ntsena. Kutani, tani hi leswi Bibe le a yi ri leyintshwa, mapeji lamambirhi a ya namarhelananile kun’we, kutani a ndzi hlaya kuavanyisa ka vu17 ematshan’wini ya vu16. “Kunene,” ndzi ku, “swi lulamile. Swi hi xikongomelo xin’wana.”

⁴³ Ntsena a swi ri erivaleni tani hi leswi mi nga twaka rito rin’wana ni rin’wana, Rito ri ta eka mina, kutani ri ku, “U nghanile eNazareta, laha A nga kulela kona; kutani a nghena esinagogweni, tani hi ntolovelo wa Yena. Kutani Muprista a N’wi nyika Matsalwa leswaku a hlaya, kutani a hlaya Esaya 61. Ku te loko a hlayile Matsalwa, A tshama ehansi; a nyiketa muprista Bibe le, Buku, kutani a tshama ehansi. Kutani mahlo hinkwawo ya nhlengeletano a ya ri ehenhla ka Yena. Marito yo xonga ya huma enon’weni wa Yena. Kutani A ku, Namuntlha Tsalwa leri ri hetisekile.”

“Namuntlha Tsalwa leri ri hetisekile.”

⁴⁴ Matsalwa ya lulame njhani! Loko mo xiya leswi eka Esaya 61:1 kufika eka 2, hilaha Hosi ya hina a yi hlaya kona, Esaya 61:1 kufika eka 2. Kambe exikarhi ka ndzimana leyintsongo ya 2 eka Esaya 61, U yime kona. Laha yi nge, “Moya wa Hosi wu le ka Mina; ku chumayela hi lembe lerinene,” kutani A yima. Hikokwalaho ka yini? Xiphemu lexin’wana, xi tisa ku avanyisa, a swi nga fambelani ni ku ta ka Yena ro sungula, kambe ku Vuya ka Yena ra Vumbirhi. Maswivona, a swi nga fambelani lahaya. Matsalwa ya ngaka ya nga endli xihoxo! Ya tshama ya ri lama hetisekeke. Yesu u yime laha matsalwa ya yimeke kona, hikuva leswi hi swona leswi a swi fanele ku kombisisiwa eka siku ra Yena, sweswi, eka ku ta ro sungula. Loko A Vuya ra vumbirhi u ta tisa ku avanyisa emisaveni; kambe kungari wa lowu. A fanele “ku chumayela hi lembe lerinene.”

45 Xiyisisani Mesiya a yimile eka platifomo, ku ta tixakahata ni Rito ra Yena ra xitshembhiso xa nguva yaleyo. Swi chavisa njhani, loko Mesiya a yimile emahlweni ka kereke! Ni kuva a languta Marito lawa yo xonga, loko Yena a te, “Ku chumayela hi lembe lerinene.”

46 “Lembe lerinene,” tani hileswi hinkwerhu hi swi tivaka, tani hi vahlayi va Bibebe, a kuri, “lembe ra jubilee.” Leswaku, laha mahlonga ni vabohiwa hinkwavo, tani hilaha, va nga yisiwa, ekhotsweni; kutani a va fanele ku nyiketa n’wana wa jaha, a va ndziho; kumbe wanhwana, ku hakela ndziho, [Xivati lexi nga riki na nchumu eka thepi—Muhleri.] nakona a va ri evuhlongeni. A swi nga ri na mhaka leswaku va tshame nkarhi wo tani hikwihi evuhlongeni, kumbe a va fanele ku tshama nkarhi wo tani hi kwihi; kwalahaya, loko lembe ri fika, ra jubili, loko mhalamhala yi twakala, munhu un’wana ni un’wana a nga ha ntshuxeka loko a lava ku tshuxeka. [Xivati lexi nga riki na nchumu eka thepi.] U tshuxekile. A wu nge hevi hlonga.

47 Kambe loko u swi tsakela ku tshama u ri hlonga, a wu fanele u yisiwa etempeleni, u ya yimisiwa ni mhandzi ya tempele, kutani va teka ntlhavu va boxa mbhovo endleveni ya wena, kutani a wu fanele ku tirhela n’wini wa wena wa vuhlonga masiku hinkwawo ya vutomi bya wena.

48 Lexi i xikombiso xo saseka njhani xa Evhangelu ya Yesu Krete! Loko yi tava yi chumayeriwile, hi nkarhi lowu amukelekaka, ni nkarhi wa Jubilee; un’wana na un’wana, swi nga ri ni mhaka leswaku u mani, i wa muhlovo wihi, i dinominexini yihi u nga eka yona, swi ngava swi tarise ku yini swidyoho leswi u nga korhamela eka swona, kumbe ku hoxeke yini ha wena; u nga ti fambela u tshuxekile loko u twa mpfumawulo wa mhalamhala ya Evhangelu yi rila. U tshuxekile!

49 Kambe loko u fularhela Hungu u ala ku ri yingisela, tsundzukani, a wu boxiwa ndleve, hi ntlhavu. Leswi swi vula, leswaku, u tlurile ndzelekanano wa le xikarhi ka ku ponisiwa na ku avanyisiwa, u ngaka u nga ha yi twi Evhangelu nakambe. U ngaka u nga ha yi emahlweni. U fanele u va hlonga ra mafambiselo lawa u nga eka wona, vutomi bya wena hinkwabyo, loko u ala ku amukela ku yingisa hi ta lembe leri amukelekaka.

50 Sweswi, xiphemu xin’wana xa swona, tani hilaha ndzi vuleke, a xi nga kali xi lava ku hlamuriwa, hikuva Mesiya loyi a taka, nkarhi wa kona sweswi, hiloko A ta tisa ku avanyisiwa.

51 Sweswi, xana swi nga endlekisa ku yini leswaku vanhu lava va tsandzeka ku tiva leswaku A ri Mani? Xana va swi hupise ku yini? Xana swi nga endlekisa ku yini, loko swi tava swi ri erivaleni ni kuva switivisiwile ni ku kombisiwa? Xana va tsandziwe hi yini ku vona xana? Loko Yena . . .

52 A ri ri Rito rihi! Ehleketani ha swona, “Namuntlha Tsalwa leri ri hetisekile emahlweni ya n’wina.” I mani a vuleke leswi? Xikwembu hi Xoxe, Lexi xi nga muhlamuseri wa Rito ra Xona N’winyi. “Namuntlha Tsalwa leri ri hetisekile.” Mesiya, hi Yexe, a yimile evukoneni bya nhlengeletano a hlanya Rito leri humaka eBibeleni, leri fambelaka na Yena, kutani a vula leswaku, “Namuntlha Tsalwa leri ri hetisekile,” kambe va tsandzekile ku ri vona Leri.

53 A ri ri khombo ra njhani leri a ri ri kona, kambe swi humelerile. Swi humelerile minkarhi yo tala. Xana swi nga humelerisa ku yini? Hakunene, kufana ni loko swi humelerile eminkarhini yin’wana, hi ku pfumela tinhlamuselo ta vanhu ta Rito. Sweswo hi swona swi swi endleke. Vapfumeri lava hi masiku ya vona, lava va vuriwaka vapfumeri, a va teka tinhlamuselo ta leswi muprista a swivula hi tlhelo ra Matsalwa. Hikokwalaho Yesu, a nga kumeki eka swin’wana swa swiyimo swa vona kumbe emintlaweni ya vona, A nga amukeriwanga eka khamphani ya vona.

54 Kutani, hikwalaho, a va swi kotanga ku tixakahata na Yena, hikuva A hambanile na vona. Vumunhu bya Yesu Kreste a byi hambanile ni bya munhu wihi kumbe wihi kuva va nga tsandzeka ku n’wi vona leswaku a ri N’wana wa Xikwembu, hikuva A ri xikombiso xa xiviri xa Matsalwa lawa ya tsariweke mayelana na Yena.

55 Ya leyo hi yona ndlela leyi Mukreste un’wana na un’wana a tiviwaka hi yona, loko vutomi bya yena byi fambelana ni leswi Mukreste a fanelaka ku swi endla.

56 Xana A nga yimisa ku yini lahaya a ku, “Namuntlha Tsalwa leri ri hetisekile emahlweni ka n’wina!” Swi twisiseka njhani, swi ve erivaleni swinene, kambe hambi swi ri tano vanhu lava a va swi twisisanga. Hikokwalaho ka yini? Swi hikokwalaho ka kuva va tekile nhlamuselo ya swileriso swa vaprista lava a va va yingisela.

57 Hakanyingi matimu ya tiecenyeta wona hi woxe. Matsalwa ya ni tihlamuselo tinyingi eka Wona, ni tinhlamuselo tinyingi ta nhlavutelo.

58 Xikombiso, ku fana ni loko Bibe le yi ku, leswaku, “Ndzi vitanile n’wana wa ku huma eEgipta,” ku vuriwa Yesu. Xiyisisani eka sweswo, mi ta kuma leswaku, nakambe a ku vuriwa Yakobo, eka Tsalwa ri ri rin’we. Yesu a ri N’wana wa Xona lonkulu. Yakobo a ri n’wana wa Xona loyi Xi n’wi vitaneke ku huma Egipta, leswi tinhlamuselo ta Scofield na tin’wana tivulaka swona, hikuva hi leswi Matsalwa a ya kongomisiwa eka swona. Hikwalaho a swi ri ni—ni tinhlamuselo timbirhi; Yi ve ni nhlamulo ya ku humesiwa ka Yakobo, niku huma ka Yesu.

⁵⁹ Swingaleswi swa hari tano ni namuntlha! Swi hikokwalaho ka kuva hi ri eka madzolonga yo kotisa yalawa, kutani vanhu va tsandzeka ku vona Ntiyiso wa Xikwembu, swi hikokwalaho ka kuva ku tele tinhlamuselo leti nga endliwa hi vanhu ta Rito ra Xikwembu. Xikwembu a xi kali xi lava munhu leswaku a va muhlamuseri wa Rito ra Xona. Hi Xona muhlamuseri Xona N'winyi.

⁶⁰ Xikwembu xi teri, ekusunguleni, "A kuve niku vonakala," ku vile naku vonakala. Sweswo a swi nga lavi ku hlamuseriwa.

⁶¹ Xi te, "Wanhwana u ta tika," kunene u swi endlile. Sweswo a swi nga kali swi lava ku hlamuseriwa.

⁶² Loko, nhlamuselo ya Xikwembu ya Rito ra Xona hiloko Xi tiyisa hi vumbhoni ni ku Ri khorwisa leswaku ri tano. Ya leyo hi yona nhlamuselo ya Xona, hi ku swi humelerisa. Kwalaho hilaha nhlamuselo ya Xikwembu yi nga kona, hiloko Xi endla Rito ra Xona leswaku ri humelela. Xa Ri hlamusela eka n'wina.

⁶³ Kukotisa loko ku nga ri na ku vonakala, kutani Xi ku, "A kuve niku vonakala," ku va kona, sweswo a swi nga kali swi lava leswaku munhu un'wana a ri hlamusela.

⁶⁴ Kambe hi kuma mafambiselo ya vanhu ya katsanisiwile na Rona, kutani, loko u swi endla, u—u ri humesela ehandle ka ndlela. Ri vile xisweswo minkarhi hinkwayo.

⁶⁵ Ndza ha ehleketa hi ndlela leyi swi nga bisa xiswona leswaku a swi ri njhani. Ehleketani hi swona, Mesiya! Hikokwalaho ka yini va tsandzekile ku N'wi vona? Hikuva, varhangeri va vona lava a va fanele kuva va N'wi tivile, lava a va fanele kuva va kumeke va tiva Matsalwa swinene, lava a va fanele kuva va twisisile Matsalwa, va tsongahatile Wanuna loyi va ku, "I n'wana la nga hungukiwa, ku—ku sungula hi swona. Hi ngaka hi nga swi pfumeli Sweswo."

⁶⁶ Endzhaku ka malembe, a hi swi pfumeli sweswo. Hi ta fa hi xikongomelo xo vula leswaku Yena a ri N'wana loyi a velekiweke hi wanhwana.

⁶⁷ Kutani swi ta humelela siku rin'wana leswaku, swo fana ni leswi Yehovha a swi endlaka namuntlha, vanhu eka tinguva leti ti taka, loko ti tava kona, va ta fa hi swilo leswi hi vulavulaka hi swona namuntlha. Mi ta fanela ku swi endla loko mfungho wa xivandzana wu tava wu fikile, kutani mi nga ha pfumeleriwi ku chumayela Evhangelu hi ndlela leyi. Loko nhlanguano lowukulu wa tikereke wu sungula ku hlangana, lowu sweswi wu nga lungheka ku va nhlanguano wa misava wa tikereke, mi ta fanela ku lemela vumbhoni bya n'wina hi vutomi lebyi byi nga bya n'wina, ka Leswi.

⁶⁸ Mi boheka ku Ri pfumela sweswi. Loko vaprista lava va nga pfuka, lava N'wi sandzeke, va ngaka va nga ha N'wi

sandzi. “Kambe,” mi ri, “loko a ndzi ri kona, a ndzi tava ndzi endle *leswi-na-leswi*.” Kunene, yaleyo a yi ngari nguva ya n’wina. Kambe, leyi hi yona nguva ya n’wina, lowu hi wona nkarhi.

Mi ri, “Kunene, loko A ri lahawani!”

⁶⁹ Bibe le yiri, “Hi yena tolo, namuntlha, ni hilaha ku nga heriki,” wa hari Yena, swingaleswi U kona lahawani. Kambe, U kona lahawani. Tani hi leswi misava yi nga hluvuka, yi tlhela yi kula, yi dyondzeka swinene; U kona lahawani hi xivumbeko xa Moya, lowu va nga taka va nga swikoti ku wu dlaya kumbe ku wu hoxa erifini. U file kan’we; A ngaka a nga ha fi nakambe. A fanele kuva nyama leswaku Xikwembu xi ta kota ku nyiketwa eka rifu enyameni, hikwalaho ka vudyoho. Kambe eka lowu nkarhi A ngaka a nga fi; hikuva i Moya wo Kwetsima.

⁷⁰ Sweswi, swi njhani ku ehleketa hi leswaku a va ri ni swilo swa vona leswi a swi lwisana na Yena! Xin’wana, hi leswaku A nga swikotanga ku joyina tirhenge ta vona. Kambe, maswivona, sweswo a swa ha N’wi endla munhu wo biha. A nga swikotanga ku joyina na—na minhlangano ya vona, a nga joyinanga ni vuprista bya vona, kambe a ri hava leswi a nga swi endlaka hi byona. Kutani swingaleswi, handle ka sweswo hinkwaswo, U ringetile ku hahlula leswi va swi akeke.

⁷¹ U nghanile etempeleni. Hi N’wi vula Munhu wo rhula; Kunene u rhurile, hakanyingi a hi swi twisisi leswaku ku rhula i yini.

⁷² A ri Wanuna wa ntwela-vusiwana, kambe minkarhi yo tala ha tsandzeka ku tiva leswi ntwela-vusiwana swi vulaka swona. Ku ngari ntwela-vusiwana wa ximunhu, a hi wona ntwela-vusiwana. Kambe, *ntwela-vusiwana*, i, “ku endla ku rhandza ka Xikwembu.”

⁷³ U hundzile hi le vuhlambelweni bya—bya Bethesda, enyangweni. Kwalahaya a ku etlerile vanhu, mintshungu ya vona. Mintshungu a yi na nambara yo karhi. Kambe kwalahaya a ku pavalarile mintshungu; swilema, lavo fe mahlo, ni lava va nga kotiki ku famba, vo khonyana. U vile ni ntwela-vusiwana eka vanhu lava, minkarhi hinkwayo. U yile eka munhu un’we loyi a nga ri xilema, bofu, la nga kotiki ku famba, kumbe ku khonyana; kumbe la karhatiwaka hi vuvabyi bya xinuna, kumbe a ri ni vulema nyana lebyi a byi n’wi hlwerisa. U vile na byona makume nharhu-nhungu wa malembe. Lebyi a byi nga ta n’wi karhata swinene, a byi nga ta n’wi dlaya. A etlele ehenhla ka xisangwana. Kutani A ku, “Xana u lava ku horisiwa?”

⁷⁴ Kutani wanuna a ku, “A ndzi na munhu la nga ndzi nghanisaka ematini, loko ndza ha ya kona, vonani, van’wana va ndzi rhangela.” Wa vona, a swikota ku famba, a vona, a swi kota ku famba famba, kambe a nga ri na matimba.

⁷⁵ Kutani Yesu a ku eka yena, “Suka u yima. Teka masangu ya wena u ya ekaya ka wena.” Kutani Yesu u vutisiwile hi mhaka ya leyo, ma swi tsundzuka leswaku Matsalwa ya swivurile leswi.

⁷⁶ A swi hlamarisi! Loko A nga ta eJeffersonville madyambu ya namuntlha a fika a va ni maendlelo yo kotisa ya lawa, hambwi swi ri tano va ta vulavula hi Yena.

⁷⁷ Kambe, tsundzukani, A tela ku ta endla xilo xin’we, lexi akuri ku rhandza ka Xikwembu. Sweswi, sweswo swi kumeka eka Mukwetsimi Yohana 5:19, mi ta kuma nhlamulo. U teri, “Ndzi vurisile, ndzi vurisile, Ndzi ri eka n’wina, N’wana a nge endli nchumu hi Yexe; kambe leswi A swi vonaka swi endla hi Tatana, sweswo N’wana wa swi endla.”

⁷⁸ Sweswi, a va fanele va swi vonile leswaku sweswo a swi ri ku tiyisisa loku ku nga kun’we na vuprofeta bya Muxe, “Hikuva Hosi Xikwembu xa n’wina xi ta mi pfluxela Muprofeta un’wana la fanaka na mina.”

⁷⁹ Mi kale mi swi xiyisisa, loko a vona wanuna, U te... Yesu u switivile leswaku a ri eka xiyimo lexi malembe yo tala. Wa vona, leswi a ri Muprofeta, U vonile wanuna ya loye a ri ka xiyimo xexo; kutani a rhelele ehansi a manyukuta—manyukuta leswaku a kuma ndlela exikarhi ka vanhu lava, a manyukuta exikarhi ka ntshungu, kufikela laha A nga kuma wanuna ya loye.

⁸⁰ U hundzile swilema, lava nga kotiki ku famba, lavo fe mahlo, ni lavo khonyana, hambwi swi ri tano i Wanuna la nga ni ntwela-vusiwana swinene. Kambe, *ntwela-vusiwana*, i ku, “endla ku rhandza ka Xikwembu.”

⁸¹ Sweswi, hi N’wi vona, tani hiloko A nga joyinanga na vona, a kuri hava lexi A nga xi endlaka hi tirhenke ta vona, swingaleswi A ri loyi a nga hlongoriwa. A nga ta swikota kuva na...

⁸² Handle ka sweswo, U yile tempeleni siku rin’wana. Wanuna u ngehene kwalahaya a fika a kuma yindlu ya Xikwembu yi ri na manyala kukotisa leswi yi nga xiswona namuntlha. A va ri eku xaveni, va xavisa, va ncinca na timali. Kutani A jikela ematafuleni ya mali; a teka tingoti a ti luka, kutani a ba lava a vari vancinci va mali etempeleni. Kutani a va languta hi mahlo ya vukari, kutani a ku, “ku tsariwile,” haleluya, “Yindlu ya Tatana wa Mina i yindlu yo khongelela eka yona; kambe mi yi endla baku ra makhamba. Kutani n’wina, hi mindhavuko wa n’wina, mi endlile milawu ya Xikwembu leswaku yi pfumala ntikelo.”

⁸³ Oho, xana ntlawa wo kotisa walowo wu nga pfumela eka Yena xana? Ee, nkulukumba. A vari eku vumbulukeni eridakeni ra tinguluve ta mavandla ni thyaka ra siku, ku fikela

laha va gwitsirisaka hi vukereki ku fikelala laha va nga ha tweeki ku fambafamba ka Matimba ya Xikwembu xa Matimba hinkwawo. A swihlamarisi loko wansati a khumbhile nguvu ya Yena kutani a horisiwa hi Yona; na rona socha ra xidakwa leri tshuteleke marha exikandzeni xa Yena a ri ya twanga vunene! Swi ya hi ku U ri tshunelela njhani. Swi ya hiku u langutelele yini. Loko u ya ekerekeni, swi ya hi ku u languteli yini.

⁸⁴ Sweswi hi N'wi vona a yimile lahaya. A swi kanakanisi leswaku vanhu a va n'wi tshinyile, a tshinyiwile, vaprista a va tshinye vanhu, "Sweswi U le kuteni lahawani eka Savata leyi landzelaka, kutani, loko A fika, mi nga tshuki mi N'wi yingisa. Sweswi, mi nga ha ya mi ya tshama lahawani, kambe mi nga tekeli nchumu enhlokweni eka leswi A nga ta swivula, hikuva A nga weli eka ntlawa wa hina. I munhu loyi a nga hlongoriwa. A nga na khadi ra xinakulobye. U pfumala na nhlana... na papila ra nhlango eka yena. Wo va munhu ntsena a nga na nchumu."

"Xana hi Yena mani ke?"

⁸⁵ "Jaha rin'wana ra mugwinihi leri ri nga tswaleriwela lahawani ehansi, hi ku tswariwa ka vuhunguki, emutini wa muvatli, laha mana wa Yena a nga tika a ngese tekiwa, kutani va ringeta ku tumbeta mhaka hi swin'wana swale handle ka ntumbuluku.

⁸⁶ "Ha switiva leswaku, loko Mesiya a ta, U ta xika hi tiphaseji ta Tilo kutani a ya eka muprista wa hina lonkulu a fika a ku, 'Hi Mina loyi, Kefasi.'" Kambe hi kuma leswaku a nga swi endlhi hi ndlela yaleyo, hikuva a swi nga tsariwanga eRitweni hi ndlela yaleyo. A kova mindzhavuko leyi nga endla hi munhu leyi yi nga endla leswaku va swi pfumela sweswo.

⁸⁷ Rito a ri vurile leswaku U ta ta hi ndlela leyi A tiseke xiswona. Kutani lahaya U yimile, a hlaya Rito, a ku ka vona, "Namuntlha Tsalwa leri ri hetisekile emahlweni ya n'wina." Kambe hambi swi ri tano va ha tsandzeka ku N'wi vona kumbe ku N'wi tiva, tani hilaha va swi endleke eka tinguva hinkwato letin'wana.

⁸⁸ Nowa a nga hava a vule swo fana, hi siku leri a nga nghena engalaveni kutani nyangwa wu pfala. Muxe a nga hava a tlakusile fasitere rero rale henhla ra ngalava, a languta nhlengeletano... Tsundzukani Xikwembu hi xona xi nga pfala nyangwa. A nga hava a teri, "Namuntlha Tsalwa leri ri hetisekile emahlweni ya n'wina," kambe nkarhi a wu nga hari kona eka vona. A chumayerile dzana ni makume-mbirhi wa malembe, a ri karhi a ringeta ku va ngenisa endzeni ka xikwekwetsu lexi a xi akile, a ri karhi a va byela leswaku Matsalwa ya ri, "HI LESWI HOSI YI SWI VULAKA, ku tava na mpfula," kambe va languterile nkarhi wo leha. Kambe Nowa u vule sweswo hi ku olova, "Namuntlha, siku leri, Tsalwa leri ri hetisekile."

⁸⁹ Muxe, hi siku leri Langavi ra Ndzilo ri nga xika Entshaveni ya Sinayi ri tiyisisa vumbhoni bya yena, Muxe a nga hava a teri, “Namuntlha Tsalwa leri ri hetisekile.”

⁹⁰ Muxe, maswitiva, a ri munhu wa Xikwembu la nga vitaniwa, la nga muprofeta. Kutani loko a ha vitaniwile, tani hi muprofeta, a fanele a va a ri na ntokoto lowu wu nga ehandle ka ntumbuluko, leswaku a tava muprofeta, a fanele ku hlangana na Xikwembu hi nghohe hi nghohe a vulavula na Xona va langutanile. Kutani xin'wana xa kona, leswi a swi vula a swi fanele swi hetiseka, kumbe kuri hava na un'we loyi a n'wi pfumelaka.

⁹¹ Swingaleswi ku hava munhu loyi a faneleke ku tivitanisa xisweswo ku kondza a vulavula na Xikwembu va langutanile, endzhaku ethelo rale mananga kun'wana, laha a nga hlangana na Xikwembu, hi xoxe. Ni vahedeni hinkwavo laha misaveni a va nga ta swi kota ku swi hlamusela swi suka eka yena; a ri kwalahaya, a swi tiva leswaku swi humelerile. Mukreste un'wana na un'wana u fanele kuva ni ntokoto wa lowo va nge se vula swin'wana hi kuva Mukreste. Ntokoto lowu wu nga wa wena n'winyi!

⁹² A ndzi vulavula na ntukulu wa mina, nkarhinyana lowu hundzeke, jaha rintsongo ra Mukhatholiki, loyi a nge teri, “Malume Bill, ndzi tsutsumile kusuka eka phuphu kuya emhandzini, ndzi ya hinkwako, ku ringeta ku kuma swin'wana.” Vusiku byin'wana ni byin'wana, loko nhlengeletano leyi yi nga si sungula, a ri eku rileni. Kutani hi nkarhi wa ni vusiku, a lorha milorho ya kuva a ta haleno, a ri karhi a tsutsumela eka altari, laha a ndzi chumayela kona, nakona a tivula leswaku a hoxile.

⁹³ Ndzi ku, “Melvin, a swi na mhaka leswaku u ringeta kuya kwihi, i tikereke tingani u nga ti joyina, i kangani kuri 'A dzunisiwe Mariya,' loku u nga ku vula, i minkateko yi ngani leyi u nga yi kuma eka vanhu, u fanele ku tswariwa nakambe hi Moya wa Xikwembu. Hi wona nchumu wu ri wun'we lowu nga rhurisaka mbilu ya munhu.”

⁹⁴ Sweswo, ndza swi tiva leswaku va ni nchumu lowu khomelaka wun'wana, namuntlha, hi ku tswariwa ra vumbirhi, ni ku tlhavulana mavoko na muchumayeri ni ku tsala vito ra wena ebukwini. Kambe, vanghana, walowo wova nawu wa kereke. A hi wona Ntiyiso wa Bibe. Loko a wu riwona, Mintirho ya Vaapostola, eka ku avanyisa ka vu2, a yi ta hlayeka hi ndlela leyi, “Loko Siku ra Pentekosta ri fikile, mufundhisi u humile a tlhavulana mavoko na vanhu.”

⁹⁵ Kambe yi ri, “Loko Siku ra Pentekosta ri fikile,” eka ku khangula ka Kereke, “ku twakarile mpfumawulo wu huma hi le Tilweni tani hi xihuhuri moya wa matimba, kutani wu tatile yindlu hinkwayo leyi a va tshamile eka yona.” Hi yona ndlela

leyi Moya wo Kwetsima wu nga xikisa xiswona ro sungula. Hi yona ndlela leyi Wu tisaka xiswona minkarhi hinkwayo kusukela siku rero. I Xikwembu, lexi nga ncinciki. Sweswi, Wu phiya vanhu.

Va ri, “Sweswo a swi ri swa siku rin’wana.”

⁹⁶ Kunene, wa hari Yena tolo, namuntlha, ni hilaha ku nga heriki. Nkarhi wun’wana na wun’wana loko Kereke yi amukela Moya wo Kwetsima, Wu ta hi ndlela leyi A wu rhumeleke hi yona ro sungula, ehansi ka swiletelo swo fana, Mintirho 2:38; a swi kalanga swi ncinca, naswona a swi nga ncinci.

⁹⁷ Tani hi swiletelo swa dokodela swa vuvabyi. U ta tsala swiletelo swo karhi swa vuvabyi byebyo, dokodela u endla sweswo. Kutani a swi teka a swi yisa eka vahlanganisi va swidzidzivarisi, kutani a chela ngopfu antidoti eka swona, wu nga havi na matimba wu nga ha ku endleli swa kahle; loko u chela chefu yo tala eka wona, wu ta ku dlaya. Wu fanele wu tsariwa hi ndlela ya dokodela.

⁹⁸ Kutani swiletelo swa dokodela hilaha hi faneleke ku amukerisa xiswona Moya wo Kwetsima ha kona hi nyikiwile hi Dokodela Simon Petro, hi Siku ra Pentekosta. “Ndzi ta mi nyika swiletelo. Hundzukani, un’wana na un’wana wa n’wina, kutani mi khuvuriwa hi Vito ra Yesu Krete eku rivaleriwani ka swidyoho, kutani mi ta amukela nyiko wu nga Moya wo Kwetsima. Hikuva xiletelo lexi xi lulamiseriwa na vona lava nge kule, kutani hambu kuri lavanyingi lava Hosi Xikwembu xa hina xi nga ta va vitana.” Xiletelo lexi nga riki ni Makumu!

⁹⁹ Muxe u vile na wona ntokoto lowu. U yile etikweni kutani a sungula ku byela vanhu, “Ndzi hlanganile ni Langavi ra Ndzilo. A ri ri eka xihlahla lexi pfurhaka. Kutani U ndzi bye leswaku ndzi mi tivisa leswi. ‘HI MINA LOYI A NGA KONA. Rhelela; Ndzi tava na wena. Teka nhonga u yi khoma hi voko ra wena u yi tlakusa eEgipta; hinkwaswo leswi u nga ta swi kombela, swi ta endleka.’”

Kunene, nkarhi wun’wana un’wana wa vaprasta a ngava a teri, “Thyaka!”

¹⁰⁰ Kambe loko va vone ntiyiso wa leswi, va swi teka, swi humelela, a va nga ta ha kota ku phikelela. Va swi tivile leswaku a rhume hi Xikwembu.

¹⁰¹ Swingaleswi, loko Muxe a ku u swi vonile, a nyika ni vumbhoni bya leswaku i Ntiyiso, kutani Xikwembu xa boheka, loko sweswo swi ri Ntiyiso, ku xakahata niku tiyisisa marito ya munhu ya loye, ya nga Ntiyiso. Walowo i ntiyiso.

¹⁰² Loko Yesu Krete a tava a yimile lahaya kutani a hlaya, siku rero, “Namuntlha Rito leri ri hetisekile emahlweni ka n’wina,” Xikwembu xi bohekile ku endla Rito ra xona ri hetiseka.

¹⁰³ Hi yimile lahawani vusiku lebyi hi vula, leswaku, “Yesu Kreste wa hari yena tolo, namuntlha, ni hilaha ku nga heriki.” Xikwembu xa boheka ku swi khorwisa leswi leswaku swi ntiyiso, hikuva i Rito ra Xona. Sweswi, xana swi endleka njhani? Swi lava ripfumelo, ku Ri pfumela. Swi lava ripfumelo, ku pfumela Rito ra Yena, leswaku Ri Ntiyiso.

¹⁰⁴ Xiyisisani leswaku ku humelele yini loko Muxe a humesa vana, ni hinkwavo lava a va n’wi landza. Lava a va nga n’wi landzeli va sele eEgipta. Kambe lava va nga landzela Muxe, loko va hume eLwandle ro Tshwuka kutani va ya nghena emananga, Xikwembu xi xikile eNtshaveni ya Sinayi. Langavi rero ra Ndzilo ri pfurhisile ntshava hinkwayo, kutani Rito ri vulavula ri huma kwalahaya, kutani Xikwembu xi nyika milawu ya khume.

¹⁰⁵ Muxe a nga hava a fambile lahaya emahlweni ka vanhu, kutani a ku, “Namuntlha Tsalwa leri Ndzi nga mi byela rona, tani hi Muprofeta wa Xona, ri ta hetiseka namuntlha. Ndzi mi byerile leswaku ndzi hlanganile na Xikwembu, nale henhla lahaya eka xihlahla lexi a xi pfurha, eka Langavi ra Ndzilo, kutani U vule leswi, ‘Ndzi ta . . . Leyi ku tava sayini. U ta vuyisela vanhu eka xivandla lexi nga lahawani nakambe.’ Kutani hi lexiya Xikwembu, eka Langavi ra Ndzilo leri fanaka ni leri ndzi mi byeleke leswaku a Xi ri eka rona, leri nembelelaka lahaya ehenhla ka ntshava. Namuntlha vuprofeta lebyi byi hetisekile. Hi Loyi u tile ku ta tiyisisa leswaku swilo leswi ndzi swi vuleke i Ntiyiso.”

¹⁰⁶ Xikwembu hi nyike vavanuna votala vo fana ni lava, lava tshembhekeke niku luluma, niku vulavula Ntiyiso, leswaku Xikwembu xa Matimba hinkwawo xi ta tiyisisa leswaku Rito ra Xona ra hari Ntiyiso! Xa hari xona tolo, namuntlha, ni hilaha ku nga heriki. Xana Xi nga tsandziwa hi yini ku swi endla xana? Xi tshembhisile ku swi endla.

¹⁰⁷ Yoxuwa a nga hava a vurile swo fana, siku a tlheleleke eKadesh-Barnea, laha a va ri na rendzo leri va nga ri famba nkarhi wo leha emananga. A va ri eku kanakaneni ka tiko leri loko ri ngava ri ri rona tiko ro fana ni leri Xikwembu xi va tshembhiseke rona. Kambe Xikwembu xi va byerile leswaku i tiko ra kahle, leri khulukaka ntswamba ni vulombe. Kutani Yoxuwa na Kaleb a va ri vona ntsena lava mbirhi lava swi pfumeleke, exikarhi ka lava khume lava a va ri na vona. Loko va vuya, a va ri na vumbhoni; a va ri na xichocho xa tidiriva lexi a xi ta kota ku rhwala hi vavanuna vambirhi lavo tiya swinene.

¹⁰⁸ Yoxuwa na Kaleb va nga hava va yimile lahaya va ku, “Namuntlha Tsalwa leri ri hetisekile. Hi lebyi vumbhoni bya leswaku tiko leri ri kahle.” Hakunene. Hikokwalaho ka yini?

“Ku na vumbhoni bya leswaku i tiko ra kahle. Xana a mi ta swi kuma kwihi swilo swo tani, eEgipta? A kuna ndzhawu yo tani hi yaleyo. Kambe namuntlha Tsalwa leri ri hetisekile.”

¹⁰⁹ A nga hava a vule sweswo, swo fana, loko a tava a profetile leswaku makhumbi ya Yeriko ya ta wela ehansi endzhaku ka loko va machile va rhendzeleka hi muti lowu ka nkombo, masiku ya nkombo, ka nkombo hi siku. Loko va rhendzelekile ro hetelela, makhumbi ya wela ehansi. Yoxuwa a nga hava a yimile a ku, “Namuntlha, Kaptein wa Ndhuna wa vandla ra Hosi loyi a ndzi byelege mavhiki lawa ya hundzeke leswaku swi ta humelela hi ndlela leyi, namuntlha Tsalwa leri ri hetisekile.” Lahaya makhumbi ya wile, ma pavalala ehansi. “Tanani, a hi fambeni hi ya ri teka. I ra hina. Namuntlha Tsalwa leri ri hetisekile.”

¹¹⁰ Swi saseke njhani, wanuna wa Xikwembu a yimela ntiyiso wa leswi swi nga xiswona!

¹¹¹ Vaisrael, enambyeni, loko va tekile tiko, va tsemakanyile. Xana va ya swi endlisa ku yini? A kuri nhweti ya Dzivamusoko. Mati a ya sungula ku khuluka hikuva xihangu a xi sungula ku n’oka, ehenhla eYudiya. Oho, a yi ri ndhuna ya xisiwana njhani ku kotisa leyi Xikwembu a xi ri na yona, ku tisa vanhu va Xona lahaya, hi nhweti ya Dzivamusoko, laha nambu wa Yordan wu teleke wu tlhela wu khapa ku tlula hilaha wu nga tshama wu wa hakona. Minkarhi yin’wana. . .

¹¹² Ndzi nga ha yima kwalahawani, loko a ndzi ri na nkarhi, wa ku mi nyika xitsundzuxo nyana. Nkarhi wun’wana u nga hava u tshamile kwalaho u ri na mfukuzani, kumbe u tshamile u ri ni vuvabyi; u ehleketa leswaku, “Hikokwalaho ka yini, mina, tani hi Mukreste, ndzi ngava hi ndlela leyi? Hikokwalaho ka yini ndzi tshamile hi ndlela leyi, loko ndzi ri Mukreste?” Nkarhi wun’wana Xikwembu xi tshika swilo swi va munyameni leswaku mi nga ha swikoti ku vona ehenhla, ematlhelo, kumbe kun’wana ni kun’wana, kutani Xi ta xi ta ku endlela endlela, leswaku u ta ku, “Namuntlha Tsalwa leri ri karhi ku hetiseka, leswi Xi nga swi tshembhisa ku swi endla.”

¹¹³ Xi pfumelerile vana va Vaheveru va famba endzeni ka khele ra ndzilo. Va ku, “Xikwembu xa hina xa swikota ku hi humesa eka khele leri ra ndzilo. Kambe, hambu kova njhani, hi ngaka hi nga khinsameli xifaniso xa wena.” Loko va huma kwalahaya, ku nuhwa ka khele a kuri ka vona. . . a ku nga ri na ku nuhwa ka khele, kumbexani, ehenhleri ka vona; va nga hava va teri, “Namuntlha Tsalwa leri ri hetisekile.”

¹¹⁴ Loko Daniel a huma ekheleni ra tinghala, a nga hava a vurile sweswo na yena.

¹¹⁵ Yohana Mukhuvuri. Endzhaku ka mune wa madzana ya malembe yo dyondzisa kereke, a swi hlamarisi loko kereke yaleyo yi ri ethyakeni hi nkarhi walowo! Loko a tava a

humelerile emananga, eYordan, a nga hava a yimile lahaya eribuweni, tani hilaha a swi endleke, a ku, “Namuntlha Tsalwa leri, Esaya 40, ri hetisekile.”

¹¹⁶ Ndzi nga ha yima lahawani ndzi mi byela leswi muprista luya a nga ndzi byela swona! A ku, “N’wananga, a wu ri hetisanga Hungu lero.”

Ndzi ku, “Miyelani.”

A ku, “U vula leswaku Mapentekostal va vona a va swi voni sweswo xana?”

Ndzi ku, “Ee.”

¹¹⁷ A ku, “Ndza swi vona sweswo.” Kutani muprista wa Mukhatholiki, na yena! Ahaa. A ku, “Hikokwalaho ka yini u nga ya nga emahlweni?”

Ndzi ku, “Miyelani.”

A ku, “A ku ndzhunisiwi Xikwembu! Ndza swi vona!”

¹¹⁸ Kutani hikwalomu ka nkarhi walowo Moya wo Kwetsima wu xikela eka makwavo wa yena wa xisati, kwalahaya nhlengeletanwini a tshamile. Kutani u yimile, a vulavula hi tindzimi leti nga tiviwiki, kutani a nyika nhlamuselo ya leswi mina na muprista loyi a hi vulavula hi swona, eka platifomo. Kereke hinkwayo, ndhawu hinkwayo, a yi dumaduma. Ku kala swi ya fika ni le ka nhlengeletano ya Oral Roberts evhikini leri nga hundza, kumbe endzhaku ka vhiki leri nga hundza, kutani a kuri ku vulavula hi nhlengeletano. Loko muprista yaloye. . . Loyi a tshamile ehansi ka Moya wo Kwetsima, a hlavutela a ri lahaya hi wansati, hi sesi wa yena ndzi pfumela tano, hi leswi a swi humelela lahaya eka platifomo, ni ku hlavutela leswi a hi swi tumbetile.

¹¹⁹ Nkarhi lowu hi hanyaka eka wona, namuntlha Tsalwa leri ri hetisekile. Namuntlha Mavoni ya ni madyambu ya fikile, kambe ha tsandzeka ku Ri vona. Xiyisisani.

¹²⁰ Yohana u teri, “Namuntlha ndzi ‘rito ra loyi a huwelelaka emananga,’ tani hilaha muprofeta Esaya a nga vula hakona. Lunghisani ndlela ya Hosi!”

¹²¹ A va swi twisisanga. Va ku, “Oho, hi wena Yesu. . .hi wena—hi wena Krete,” kumbexani.

¹²² A ku, “A ndzi Krete.” A ku, “A swi ndzi ringanelanga ku ntshuxa tintangu ta Yena. Kambe,” a ku, “U yimile exikarhi ka n’wina, lahawani,” hikuva a ri ni ntiyiso wa leswaku u fanele A va kona. U fanele kuva esikwini ra yena, hikuva Xikwembu xi n’wi byele leswaku a fanele a tivisa hi Mesiya.

¹²³ Siku rin’wana Wanuna lontsongo u tile a ri karhi a famba kwalahaya, kutani u vonile xo kotisa Layiti ehenhla ka nhloko ya Yena, sayini. Kutani a huwelela, “Vonani Xinyimpfana xa Xikwembu! Namuntlha Tsalwa leri ri hetisekile emahlweni ya n’wina.” Hakunene.

¹²⁴ Hi Siku ra Pentekosta, hi ndlela leyi Petro a yimeke ha yona a tshaha Matsalwa, ya Yoel 2:38. Loko, hinkwavo va ha ri eku hlekeni, ka vanhu lava. A va nga swikoti ku vulavula hi tindzimi ta vona. A va nghanghamela eka tin'wana. Bibeke yi teri, "Hi tindzimi leti avaneke." *Kuavana* swi vula "ku hambana" ka tindzimi, va ngari ku vuleni ka nchumu, ntsena ku nghanghamela. Va tsutsuma tsutsuma tani hi vanhu lava pyopyiweke!

¹²⁵ Hinkwavo ka vona va teri, "Kunene, vanhu lava va pyopyiwile. Ma nga va languta, langutani hi ndlela leyi va endlisaka xiswona, hilaha vavasati ni vavanuna. A va nga ri na oda," a swi vula hi ntlawa va vukhongeri wa siku lero.

¹²⁶ Petro a yima exikarhi ka vona, a ku, "Vavanuna na n'wina vamakwerhu, n'wina lava mi tshamaka eYudiya, tivani leswaku vanhu lava a va pyopyiwanga, tani hi leswi mi ehleketisaka xiswona, vonani i awara ya vunharhu ya siku. Kambe hi leswi vuriweke hi muprofeta Yoel, 'Kutani swi ta humelela emasikwini ya makumu, Ndzi ta chela Moya wa Mina ehenhla ka nyama hinkwayo.' Namuntlha Tsalwa leri ri hetisekile." Hakunene-nene.

¹²⁷ Luther a ri kahle enkarhini wa yena. Wesley a ri kahle enkarhini wa yena. Pentekosta a yi ri kahle enkarhini wa yona. Ku hava lexi a xi humile endleleni.

¹²⁸ Sweswi ndzi mi kombela leswaku mi kambisisa nguva na nkarhi lowu hi hanyaka eka wona, ni Rito leri hi tshembhisiweke rona ra namuntlha. Loko hi tlhelela eka tinguva ta le ndzhaku, vanhu va nga ha ku, "namuntlha Tsalwa leri," "namuntlha Tsalwa leri," kutani hi ri yini hi Tsalwa ra siku ra namuntlha xana? Xana hi tshembhisiwile yini eka siku ra namuntlha? Xana hi yimile kwihi? I awara yihi leyi hi hanyaka eka yona; loko wachi yi ri ekubeni, wachi va xisayense, timinsetse tinharhu ku nga se ba xikarhi ka vusiku? Misava yile ku rhurhumeleni. Kereke yi le ka xiyimo xa mpfilumpfilu. Ku hava na un'we loyi a tivaka laha a nga yima kona. Xana i nkarhi muni wa siku xana? Xana ri ri yini Tsalwa ra namuntlha? Swiyimo swa kereke, kumbe, swiyimo swa kereke namuntlha!

¹²⁹ Emisaveni, tipolotiki, mafambiselo ya hina ya swa misava, ya bole kutlula mpimo. A ndzi mupolotiki. Ndzi Mukreste. Kambe, ndzi hava leswi ndzi nga vulavulaka hi swona hi tipolotiki, kambe ntsena ndzi ri va borile hi matlhelo hinkwawo.

¹³⁰ Ndzi hlawurile kan'we, kwalaho a kuri ka Krete; ndzi fanele ku wina. Javulosi u hlwule ku lwisana na mina, kutani Krete u ndzi hlawurile; swi ya hi ku nhlawulo wa mina i wa le tlhelo rihi. Ndzi tsakile hikuva ndzi yi hlwulele Yena; tshikani

misava yi vula leswi yi swi lavaka. Ndza ha pfumela leswaku wa ha ri Yena tolo, namuntlha, ni hilaha ku nga heriki. U ta swikhorwisa. Hakunene U ta swi endla. Hakunene.

Ku engeteleleka ka vugevenga, nandzu wa vuntshwa!

¹³¹ Langutani tiko ra hina, ri tshame ri va xiluva xa misava. Ntshuxeko wa hina lowukulu wu vumbiwile endzhaku lahaya eka—eka . . . ku hlambanya ka ntshuxeko. Kutani ku hlambanya ka ntshuxeko ku sayineriwile, kutani hi vile ni ntshuxeko. Kutani ni vakokwana wa hina lavakulu, ni swilo leswi va swi endleke; hi vile ni tiko ra kahle.

¹³² Kambe sweswi ri le ku bozeni, ri tlhela ri nhlahleka, ni ku rhurhumela, ni kuva ri ti nyiketela. Ni kuva ri ringeta ku humesisa vanhu swibalo, leswaku ri kuma mali yo yi yisa halahaya, ri xava xinakulobye ni valala va vona; va yi tlherisela endzhaku va yi hoxa eswikandzeni swa hina. Nyimpi yo sungula ya misava, nyimpi ya vumbirhi ya misava, kutani va ha ya emahlweni eka ya vunharhu. Hakunene. Tipolitiki ti borile, ti onhakile, tibole ku fikela emakumu. Ntsena tani hilaha Matewu 24 yi vuleke leswaku swi tava tano, “Tiko rin’wana ri ta pfukela tiko rin’wana, mfumo wun’wana wu ta pfukela mfumo wun’wana.” Swilo leswi hinkwaswo swi ta humelela. A hi langutiseni leswi sweswi. Hi swona.

¹³³ Xiyisisani swin’wana, kuengeteleka ka vulavisisi bya xisayense. Sweswi, nkarhi wun’wana, ntsena . . . Kokwana wa mina wa xinuna u yile a ya vona kokwana wa mina wa xisati, hi xikocikara xo kokiwa hi homu. Sweswi i jete ya xihaha-mpfhuka, kumbe hambu kuri obiti emoyeni, eka mpfhuka wale handle. Swi kahle . . . Njhani, i mani a nga swivula leswi? Daniel 12:4, yi ri, “Vutivi byi ta andza swinene emasikwini ya makumu.” Ha wu vona nkarhi lowu hi hanyaka eka wona. Xiyisisani sweswi xi—xi xiyimo xa misava, xiyimo xa sayense.

¹³⁴ Kutani xiyisisani nakambe, namuntlha, eka mafambiselo ya dyondzo ya hina. Sweswi mi nga ringeti ku swi kaneta leswi. Ndzi na phepha-hungu ra kona, vadyondzisa timhaka ta swa masangu etikere- . . . e swikolweni swa hina, leswaku swichudeni leswi nga hari swintsongo swi endla timhaka ta masangu swi vona loko swi ngava na munghana emisaveni. Hi swona, nkulukumba.

¹³⁵ Xana hi tlhelo ra vuprista bya hina kona ke? Madyambu lawa ndzi vile na xiphemu xa phepha. Leri humaka eLos Angeles, California, laha xijumba xa vafundhisi, va Baptist na Presbyterian, vaministara, va ngeniseke xijumba xa vavanuna va ri mbewu rin’we va tlhela va endla timhaka ta masangu hi rimbewu rin’we, va vula leswaku va ringeta ku va wina leswaku va ta eka Xikwembu. Loko, sweswo swi ri swin’wana swa mindzhukano ya awara leyi, Vusodoma! Hambu ku ri nawu wu wa khomile.

136 Xana hi le kwihi sweswi? Mafambiselo ya hina hinkwawo ya hi bolelele ehansi ka hina. Ndzi vonile ku andza ka vavanuna lava tekanaka hi rimbewu ri ri rin'we va andza ku rhendzeleka hi United States tani hilaha swi nga engeteleka hi makume mbirhi kumbe makume nharhu wa tiphesente n'waxemu. Ehleketani hi swona, wanuna a hanya ni wanuna, kufana ni leswi va swi endleke eSodoma.

137 Ku engeteleka vugevenga, nandzu wa vuntshwa! Xana hi hanya eka awara yihi xana? Namuntlha Rito leri ra vuprofeta ri hetisekile.

138 Vukhongereri bya misava, kereke yona hi yoxe, kereke, leyi nga vitaniwa, leyi hi yi vitanaka kereke leyi yi nga vitaniwa, nguva ya kereke yo hetelela, nguva ya kereke ya Pentekostal, yi kwihi xana? Yi le Laodekiya, tani hilaha Matsalwa ya vuleke hakona.

139 Namuntlha va tshikile swogoga. Vavasati va vona va ambarile swo koma. Vavanuna va vona va . . . I nchumu lowu wu chavisaka. Van'wana va vona va tekile ka nharhu kumbe ka mune, va ri eka tibodo ta madikoni, ni swin'wana. Va swi chichile, va nghenisa ku bola, hikuva va nghenisile tikhansele va teka ndhawu ni misava.

140 Kutani, namuntlha, va ni miako yo antswa kutlula leyi va nga tshama va va na yona. Tindhawu tin'wana, yin'wana ya tona i muako wa aditoriyamu ya makume ntlhanu wa mamiliyoni, makume ntlhanu wa mamiliyoni wa tidolara. Ya Mapentekostal! Hi yi tolovele kuva yi ri ehansi ekhoni, makume mbirhi-ntlhanu wa malembe lawa ya nga hundza, va chaya tamborini. Va ku, "Hina . . ."

141 Hikuva, Matsalwa ma ri, eka Nhluvutelo 3, leswaku mi, "Fumile," ma ku, "Ndzi fumile. Ndzi tshame tani hi hosikazi. A ndzi pfumali nchumu.' Nakona a wu switivi leswaku u wa khombo, u mupfumari, u xisiwana, a wu ambalanga, u bofu, kambe a wu swi tivi!"

142 Namuntlha Tsalwa leri ri hetisekile emahlweni ya n'wina. Amen! *Amen* swivula "a swive tano." A ndzi amenisi mina, kambe ndzi vula leswaku ndzi pfumela leswaku Ri Ntiyiso. Namuntlha Tsalwa leri ri hetisekile.

143 Kereke ya Pentekostal yi le xiyin'weni xa Laodekiya. Oho, va ha tlula tlula va tlhela va huwelela, va ri karhi va ya emahlweni loko vunanga byi chayiwa. Loko vunanga byi yima ku chayiwa, kumbe vunanga byin'wana bya biti ya nhamu van'wana va vona va byi chayaka va tlhela va byi vula Yukreste, loko byona byebyo byi yima, ku kwetsima hinkwako ka hela. Ina?

144 Loko byi ri vudzunisi bya xiviri bya Xikwembu, ku hava makhwela lawa ya matimba lawa ya eneleke—eneleke

emisaveni yo ku yimisa. Loko hahunene byi huma eka Xikwembu, a swi kali swi lava vunanga kuva byi biwa. Swi teka Moya wo Kwetsima wa Xikwembu ku xikela eka byona. Hi swona swi byi endlaka sweswo.

¹⁴⁵ Kambe i khale va Ri rivarile, hikuva va ntlawahata nyiko ya Moya wo Kwetsima, “vumbhoni bya ku vulavula hi tindzimi.” Kutani ndzi twile javulosi na valoyi va vulavula hi tindzimi.

¹⁴⁶ Moya wo Kwetsima i Rito ra Xikwembu leri nga endzeni ka n’wina, leri ri tikombisaka Rona n’winyi hiloko wena u amukela Rito. Ehandle ka sweswo, ri ngaka ri ngavi Moya wo Kwetsima. Loko va ku i Moya wo Kwetsima, kambe va ala Rito rin’we ra Bibebe, wu ngaka wu ngavi Moya wo Kwetsima. Byebyo i vumbhoni hambu wa pfumela kumbe a wu pfumeli.

¹⁴⁷ Xiyisisani sayini yin’wana leyikulu. Vayuda vale kaya ka vona; tiko leri ri nga ra vona, mali leyi yi nga ya vona, xirho xa United Nations. Va ni vuthu ra vona. Va ni hinkwaswo. Va le kaya ka vona; leri, Yesu a nge teri, “Dyondzani hi xifaniso xa murhi wa nkuwa.” Kwalahaya va kona, va tlhelele ekaya eka tiko ra vona. Namuntlha Tsalwa leri ri hetisekile, Vayuda vale etikweni ra vona.

¹⁴⁸ Namuntlha Tsalwa leri ri hetisekile, Nguva ya Kereke ya Laodekiya.

¹⁴⁹ Namuntlha Tsalwa leri, Matewu 24, ri hetisekile. Misava yi le ku boleni, swilo hinkwaswo; matiko ya pfukela matiko, ku ninginika ka misava eka tindhawu to hambanana, swihuhuri swo chavisa swi xikela ehansi, swi ninginisa matiko, ni kuya emahlweni, makhombo lawakulu hinkwako. Namuntlha Tsalwa leri ri hetisekile.

¹⁵⁰ Sweswi hi kuma xiyimo xa misava. Hi vona hilaha kereke ya ntolovelo, ya ntolovelo . . . Nhlngano, dinominexini, ha ku vona laha va nga kona. Ha ku vona laha matiko ya nga kona. Kutani ha swi vona leswaku namuntlha switshembhiso leswi swi hetisekile.

¹⁵¹ Sweswi, kambe eka siku leri ku fanele ku ta yale henhla, Mbewu ya Vukosi bya Abraham. Sweswo hi leswi hahunene Yi nga tava xiswona, yi tava yi ri Vukosi bya Mutekiwa wale Vukosini, bya N’wana la tshembhisiweke. Tani hilaha ndzi vuleke vusiku bya matolo, a yi ngevi mbewu ya ntumbuluko, yi tava yi ri Mbewu ya ximoya. Ku fanele kuva ni Mutekiwa wa ximoya loyi a nga ta kurisiwa, leyi yi nga tava Mbewu ya Vukosi bya Ripfumelo ra Abraham ra N’wana wa Vukosi bya Abraham. U fanele ku humelela eka xivono emasikwini yo hetelela, kutani nkarhi na ndzhawu hi leswi nga tshembhisiwa ku nyikiwa Yena.

¹⁵² Hi kuya hi Malakiya 4, Matsalwa, ku fanele ku pfuka Hungu leri ri nga ta ninginisa timbilu ta vanhu leswaku tithlelela endzhaku eka vatatana va vaapostola nakambe. Ku fanele ku pfuka un'wana a va eka xivono, hi matimba ya Eliya, loyi a nga ta pfuka a va eka xivono; wanuna loyi a nga tata a huma emananga, nakona u tava na Hungu leri nga ta tsutsuma ri tlhelela eRitweni nakambe. Ya leyo i awara leyi hi hanyaka eka yona.

¹⁵³ Kutani, langutani sweswi, ndza mi vutisa eka awara leyi, n'wina vanhu va kwala eJeffersonville. Hi 1933, Layiti leyi nga riki ya ntumbuluko leyi yi weleke halahaya nambyeni, hi siku leri a ndzi ri eku khuvuleni ka vanhu va ntlhanu wa madzana hi Vito ra Yesu Kreste, ndza ha ri kwalomu ka jaha ra makume mbirhi wa malembe hi vukhale. Xana Ri te yini, Jeffersonville? Xana a kuri yini Lexi a xi ri enkondzweni wa Spring Street kwalahaya, loko *Courier Journal*, ndzi pfumela leswaku a kuri *Louisville Herald*, yi khomeke atikili ya Rona? Ri yile ri ya nembelela hi ku tsemekanya Associated Press, ri nembelela ku fika eCanada. Dokodela Lee Vayle u ri handzurile a ri susa ephepheni, eCanada, hi 1933.

¹⁵⁴ Loko ndza ha khuvula munhu wa vukhume nkombo, ehansi ka Vumbhoni lebyi; kutani ma xitwa xitorhi hinkwaxo. Loko ndza ha yimile kwalahaya, ndzi khuvula munhu wa vukhume nkombo, Layiti yi xikile yi huma eTilweni, yi vangamisa ehenhla kwalahaya, tani hi Nyeleti leyi weke hi le Tilweni. Rito riku, "Tani hi Yohana Mukhuvuri a rhumiweke ku ta lulamisa ndlela ya ku ta ka Kreste ro sungula, Hungu ra wena ri ta lulamisa ku Vuya ka Yena ra vumbirhi, eka misava hinkwayo." Namuntlha Tsalwa leri ri hetisekile.

¹⁵⁵ [Nhlengeletano yi tsaka—Muhleri.] Namuntlha! [Nhlengeletano yi tsaka swinene niku dzunisa Xikwembu.] Xikwembu xi swi tshembhisile. Ku humelele yini? Namuntlha Ri fambile misava hinkwayo.

¹⁵⁶ Kutani loko Xikwembu xi tava xi enhlile kwalahaya kutani xi ku, loko ndza ha ri mufana lontsongo, exihlahleni lexi a xi pfurha, kumbe xihlahla lexi lahaya ehenhla, lexi pfurhaka Langavi ra Ndzilo, ehenhla lahawani endhawini ya Wathen eUtica Pike; ndzi ri karhi ndzi panga mati endzhaku lahaya, ya suka eka dulu lero ma ya ekhuwanini rale masanini, ma wu tiva ntiyiso wa kona. Xi teri, "U nga tshuki u dzaha, kumbe kunwa, kumbe ku thyakisa miri wa wena, hikuva kuni ntirho lowu u faneleke ku wu endla loko u kurile." Ndzi nyika vumbhoni bya leswi tani hi Ntiyiso, bya leswi ndzi nga Swi vona. Kutani Xikwembu, tani hilaha Xi swi endleke na Muxe, u vulavurile ni nhlengeletano ehansi halahaya, kutani a ku, "Lowu i Ntiyiso."

Namuntlha Tsalwa leri ri hetisekile exikarhini ka hina.

157 Langutani hilaha Xi vuleke hakona hi ku vonisisa, ni hilaha swi nga tava ha kona; kusuka eka ku tlhandleka mavoko ehenhleri ka vona, ku tiva swihundla swa timbilu. Namuntlha Tsalwa leri ri hetisekile emahlweni ya lawa ya nga ka hina.

158 Switshembhiso leswi swi nga endliwa, xiyisisani, hinkwaswo switshembhiso swi tiyisisiwile ni ku hetisisiwa hi Xikwembu xa switshembhiso. Langutani, xi hayekiwile eWashington, D.C., madyambu lawa, xifaniso xa Ntsumi ya Hosi!

159 Tani hilaha George J. Lacy, murhangeri wa FBI wa vukandziyisi bya tintiho ni dukumente ya mfumo wa United States, u xi kamberile a ri eHouston, Texas, kutani a ku, “Lexi i Xivumbiwa lexi xi nga riki xa ntumbuluko lexi xi nga tshama xi fodiwa eka misava hinkwayo.” A fanele ku swi tiva; hi yena wo antswa emisaveni hinkwayo, wa swona.

160 Tsundzukani, lahaya Ri nembelerile, tani hi Ntiyiso, Langavi ra Ndzilo reriya ri nga rhangela Israel endzhaku halahaya emananga. Ra ha rhangela ni namuntlha, muxaka waluwa wa Hungu, ra ku, “Humani eEgipta!”...?... Namuntlha Tsalwa leri ri hetisekile. Ma ri tiva Hungu leri a nga ri vula.

161 Langutani eka xivono xa le Tucson, malembe manharhu lama hundzeke, loko ndzi tava ndzi yimile lahawani exindledyanini. Loko, ntlhanu wa malembe ku nga si va na sweswo, U teri, “Siku leri doroba leri ri yisaka mhandzi ya va vekiwa emahlweni ka gede liya, mi hundzuluka mi languta eVupela-dyambu.” Vanhu va tabernakele ya mina lava nga kona lahawani, va swi tiva leswaku swi hume- . . . xisweswo—hi nkarhi walowo. Hi swona sweswo.

162 Kutani hi siku leri Nkul. Goynes ni van’wana lava a va ri ehenhla kwalahaya, kutani va rhelerisa mhandzi ya leyo ehansi, ndzi ku eka nsati wa mina, “Kuna swin’wana hi mhaka leyi.”

A ku, “I yini xana?”

Kutani ndzi nghenile ndzi languta xibukwana xa mina. Kwalahaya a swi ri kona.

163 Kutani hi mixo walowo wu landzelaka, hi awara ya khume, loko ndza ha tshame kwalahaya, ekamareni ya mina, kwalomu ka awara ya khume, Ntsumi ya Hosi yi enhlile. Yi ku, “Famba eTucson. U tava u ri en’walungu-vuxa bya Tucson, kutani kwalahaya ku tata Tintsumi ta nkombo ti ri ntlawa leti nga ta ninginisa misava leyi yi ku rhendzeleke.” Yi tlhela yi ku, “U ta byeriwa hinkwaswo loko u ri kwalahaya.”

164 I vangani va swi tsundzukaka sweswo, lahawani, loko swi nga si humelela? [Nhlengeletano yi ku, “Amen.”—Muhleri.]

Ku na vavanuna lava va nga tshama kwalahawani eka muako wa lowu vusiku byebyi, lava a va yimile kwalahaya loko swi humelela.

¹⁶⁵ Kutani ri ku, “Swilemo swa Nkombo swa swihundla leswi tumbetiweke swa Bibehe hinkwayo swi ta pfuriwa, kutani ku hetiseka Nhlavutelo 10, leswaku hinkarhi wa Hungu ra Ntsumi ya vunkombo swilo leswi swi ta hetiseka.” Namuntlha Tsalwa leri ri hetisekile emahlweni ya n’wina. Namuntlha Tsalwa leri ri hetisekile.

¹⁶⁶ Lembe leri hundzeke, ndzi yime eka ndzhawu leyi fanaka, Nkul. Woods lahawani na mina, hi karhi hi gonya xiganga, hi ri ni maendlelo ya n’wana ya gome, hikwalaho ka nsati wa yena loyi a vabya. Moya wo Kwetsima wu teri, “Rhwalelani ribye leri nga lahawani ehansi. Ri hoxe emoyeni. Loko ri vuya ehansi, u ku, ‘HI LESWI HOSI YI SWIVULAKA, ku tava niku avanyisa loku nga ta ba misava.’ N’wi byehe leswaku u ta vona voko ra Xikwembu, endzhaku ka tiawara tingari tingani.”

¹⁶⁷ Ndzi byehe Nkul. Woods; loyi a nga kona madyambu lawa. Kutani, ndza pfumela, kwalomu ka nhungu kumbe khume wa vavanuna, kumbe khume nthanu, lava a va ri kona kwalahaya loko swi humelela; hi mixo lowu landzelaka, loko Hosi yi ta xika hi xihuhuri yi fika yi rima ntshava leyi a yi hi rhendzerile, xi tshovelela ni marhavi ya mirhi, yi tlhela yi bulusa ka nharhu, kutani yi ku, “Kuavanyisa ku kongomile ethelo ra West Coast.”

¹⁶⁸ Masiku mambirhi endzhaku ka sweswo, ku va Alaska yi mbombomela ehansi ka misava. Kusukela kwalaho, kuya ehenhla nile hansi ka Ribuwa, ku bodlha ka kuavanyisa ka Xikwembu ku lwisana na xikirini xa ximoya. Ku ni khetenisi ra nsimbi, ku ni khetenisi ra nsengele, ni khetenisi ra vudyoho.

¹⁶⁹ Nhluvuko wu fambisanile ni dyambu; swi tano ni Evhangelu. Yi tile yi huma evuxeni yi kongoma evupela-dyambu, kufana na leswi dyambu ri fambisaka xiswona. Kutani sweswi Yi le West Coast. Yi ngaka yi nga ha hundzeli emahlweni; loko Yi nga ha ya emahlweni, Yi nga tlhela endzhaku evuxeni nakambe.

¹⁷⁰ Muprofeta u teri, “Ku tava na siku leri nga taka ri nga vuriwi vusiku kumbe nhlikanhi,” siku leri ri kanganyisaka, leri ri taleriweke hi mpfula ni nkungwa, ntsena swi ringanerile ku tiva ntsena ku tiva leswaku kereke yi joyinisiwa ku yini kumbe ku tsarisa vito ra wena ebukwini. “Kambe ku tava na ku Vonakala hinkarhi wa madyambu.” Namuntlha Tsalwa leri ri hetisekile.

¹⁷¹ D-y-a-m-b-u reriya—reriya ri humaka evuxeni hi rona d-y-a-m-b-u leri pelaka evupela-dyambu. Ka ha ri N’-w-a-n-a wa Xikwembu yaluya a humeke hi le vuxeni A tlhela a tikombisa tani hi Xikwembu lexi tivonakariseke enyameni, wa ha ri N’-w-a-n-a wa Xikwembu haleno vupela-dyambu, loyi

A tikombisaka exikarhi ka kereke madyambu lawa, wa ha ri yena, tolo, namuntlha, ni hilaha ku nga heriki. Ku Vonakala ka madyambu ka N'wana ku fikile. Namuntlha Tsalwa leri ri hetisekile emahlweni ka hina.

¹⁷² Xana hi le kwihi eka nguva leyi ya Abraham? Xana hi le kwihi eka nkarhi lowukulu hi yimeke eka wona, awara leyikulu leyi hi hanyaka eka yona? Swivono hinkwaswo swi hetisekile.

¹⁷³ A mi tsundzuki loko ministara lontsongo wa munghana wa hina lahawani, kereke leyi yi tihlanganiseke ya sesi, Junior Jackson, u tile eka hina hi ku tsutsuma vusiku byin'wana, mina a ndzi ri kwalahaya ehansi. A ku, "Ndzi na—na norho, Makwerhu Branham, lowu wu ndzi karhataka. Ndzi vonile vamakwerhu hinkwavo va hlengeletanile ehenhla ka xiganga." A ku, "Ehenhla ka ntshava leyi, a wu hi dyondzisa hi dyondzo ya maletere lawa a ya tsariwile, lawa a ya languteka ku kotisa, eka maletere lawa nkarhi wun'wana ya vatliweke ya huma endzeni ka ribye. Loko u hetile sweswo, hinkwaswo a swi hetisekile, u hi byerile, u ku, 'Tshinelani ekusuhi,' kutani hinkwerhu hi hlengeletana."

¹⁷⁴ A ku, "U fike u yima kun'wana kutani, swi languteka kufana, ni loko u khome nsimbi yo fana ni yo hlomula swipikiri kutani u ba vuhenhla bya phiramidi nyana lebyi byi pfuleka. Kutani, loko yi pfulekile," ndzi ku, "ribye ra graneti leri a ri nga tsariwanga nchumu eka rona. Nakona u hi byele leswaku 'hi languta ehenhla ka rona.' Kutani n'wina hinkwerhu... Hinkwerhu hi sungula ku languta." Ndzi ku, "Ndzi hundzuluxe nhloko ya mina, kutani ndzi ku vona u ri karhi u kongoma evupela-dyambu, hi ku tika tani hilaha u nga kota ha kona, u kongome laha dyambu ripelaka kona." I vangani lava va ha swi tsundzukaka? [Nhlengeletano yi ku, "Amen."—Muhleri.]

¹⁷⁵ Kutani ndzi yimile kwalahaya xinkadyana ku kondza Moya wo Kwetsima wu swi hlavutela. Ndzi ku, "Bibele hinkwayo, tani hiloko yi hlavuteriwile hi vunyingi eka munhu, hi vululami, ni vukwetsimi, ni hiku khuvuriwa hi Moya wo Kwetsima, nkhumulo hi Vito ra Yesu, ni hinkwaswo swilo leswi, swi hlavuteriwile; kambe ku ni swihundla leswi tumbetiweke endzeni, hikuva Bibele yi lemeriwile hi Swilemo swa Nkombo. Ndzi boheka kuya kwalahaya ndzi ya swi lavisisa."

¹⁷⁶ Mixo wolowo loko Tintsumi teto ta nkombo ti xikile ti ta bulusela misava, maribye ya hahela hinkwako, Tintsumi ta nkombo ti yimile lahaya ti ku, "Thelela endzhaku eJeffersonville, kusuka laha u humaka kona, hikuva Swilemo swa Nkombo swa swihundla swa nkombo swi ta pfuriwa."

¹⁷⁷ Hi hina lava, namuntlha, hi twisisa *Mbewu ya Nyoka*. Hi masiku mangari mangani, loko Xikwembu xi swi rhandza, hi ta

twisisa ku lulamisiwa ka *Vukati Niku Thalana*. Ni hinkwaswo leswi Xikwembu xi swi pfuleke, Xilemo xin'wanana na xin'wana, swihundla hi mpfhuka misava yi tumbuluxiwile. Kutani hi tiphinile, hi Vukona bya minkateko ya Yena! Walowo i ntiyiso. Namuntlha, Tsalwa leri!

¹⁷⁸ Magazini wa *Life* wu hlayisile atikili ya swona, “Layiti ya xirhendzevutani ya xihundla yi yile emoyeni ehenhla ka Tucson na Phoenix,” hi ndlela leyi ndzi mi byeleke ha yona kwalomu ka lembe ri nga si humelela, hilaha ri nga tava ha kona, ku kotisa thirayi-engele. Xifaniso xi hayekiwile kwalahaya ekerekeni. N'wina lava mi tekeke magazini yi na swona. Kwalahaya swi kona, ku fanana. Va teri, “Ri makume mbirhi-nkombo wa timayili hi ku ya ehenhla ni makume nharhu wa timayili hi ku anama.” A va swi twisisangi na sweswi leswi humeleleke. Ri humelerile hi ndlela ya xihundla ri tlhela ri nyamalala hi ndlela ya xihundla.

¹⁷⁹ Makwerhu Fred Sothmann, Makwerhu Gene Norman na mina, a hi yimile kwalahaya. Vanharhu i timbhoni. Ku kotisa loko A tava a tekile van'wana entshaveni; Petro, Yakob, na Yohana, ku nyika vumbhoni. Va yimile kwalahaya va swivona loko swi humelela, na loko swi endleka.

¹⁸⁰ Hi Leriya lahaya, ri nemebelelaka esibakabakeni; e kule, a ku ngari na mberha, a ku ngari na ndzhongo kumbe nchumu lowu wu—wu nga endlaka nkungwa. A va tava va te njhani kwalahaya? A ku ri Tintsumi ta Xikwembu leti a ti tlhelela endzhaku, endzhaku ka Hungu ra tona. Namuntlha vuprofeta bya tona byi hetisekile exikarhini ka hina. Namuntlha Tsalwa leri ri hetisekile.

¹⁸¹ Langutani, Swilemo swa Nkombo swi pfuriwile. Xihuhuri xi kongoma eWest Coast. Sweswi, mi nga swi hupi, tani hilaha va swi endleke nkarhi lowu nga hundza.

¹⁸² Sweswi, rinoko ra hina, ku tshunelela swintsongo siku ra hina. Xana Matsalwa ya ri yini hi siku leri ra namuntlha, ni hi nkarhi lowu hi hanyaka eka wona? Yesu wa vulavula. . . A ndzi na nkarhi wo vulavula hi wona hinkwawo, kambe ndzi lava ku teka lawa hi nga se pfala.

¹⁸³ Yesu u teri, eka Mukwetsimi Luka ku avanyisa ka vul7, vhese ya vu30. Yesu Kreste, yena Rito hi Yexe! Xana ma swi pfumele sweswo xana? [Nhlengeletano yi ku, “Amen.”—Muhleri.] Yesu Kreste, yena Rito hi Yexe, leri endliveke nyama, u vulavurile a vula leswi Rito ri nga tava xiswona emasikwini ya makumu, leswi swi nga tava swikombiso swa ku hela ka misava. U va byerile leswaku matiko ya ta pfukelana, kambe U teri, “Tani hi leswi swi ri xiswona emasikwini ya Sodoma, swi tava tano enkarhini lowu N'wana wa munhu a nga ta tikombisa ha wona.”

184 Sweswi, loko Yesu a ta emisaveni, u tile hi vito ra Vana vanharhu. N'wana wa munhu, laha ku nga muprofeta; N'wana wa Xikwembu; na N'wana wa Davhida.

185 Sweswi, U hanyile lahawani emisaveni. A nga kalanga a vula leswaku hi Yena N'wana wa Xikwembu. U teri, "Ndzi N'wana wa munhu." Yehovha hi Yexe u vitanile Ezekiel na vaprofeta, "N'wana wa munhu." Hikuva, A fanele kuta a ta hetisisa Matsalwa tani hi muprofeta. Muxe u teri, "Hosi Xikwembu xa n'wina xi ta mi pfluxela muprofeta kukotisa mina." Hi xona xivangelo lexi endleke leswaku A ngavi N'wana wa Xikwembu kwalahaya, hikuva A ri N'wana wa munhu. Yena... "Rito ri ta eka vaprofeta." Kutani A ri Rito leri hetisekeke. N'wana wa munhu, ku nga—nga muprofeta lonkulu... Ku nga ri muprofeta lonkulu ntsena, kambe Xikwembu xa Muprofeta, "Ku hetiseka ka Vukwembu a kuri eka Yena." Swingaleswi, A ri N'wana wa munhu.

186 Sweswi, kwalomu ka magidi mbirhi wa malembe, A ri karhi a tiveka eka hina a ri N'wana wa Xikwembu, hi Moya.

187 Kutani eka miliniyamu, U tava N'wana wa Davhida, loko a ri eXiluvelweni. Ha swi tiva hinkwerhu sweswo, lava pfumelaka Matsalwa.

188 Sweswi, Yesu u teri, ntsena ekuheleni ka nguva leyi ya kereke leyi hi hanyaka eka yona, leswaku, "N'wana wa munhu wa ha ta tlhela a hlavuteriwa nakambe hi maendlelo yo fana ni leswi a ya ri xiswona, tani hilaha a swi ri xiswona eSodoma."

189 Langutisani hilaha, hi ximatimu, A swi nyikeke. U teri, "Tani hilaha a swi ri xiswona emasikwini," yo sungula, "ya Nowa, hilaha a va dya, va nwa, vatekana, ni ku hlomisana." Kutani A hi tshineta, ekusuhi, na ko hetelela, eka N'wana wa munhu, eSodoma. Hikuva, kwalahaya A tirhana na Vayuda; lahawani, eSodoma, U tirhana ni Vamatiko. Kwalahaya, U va nwerisile hinkwavo ematini, eku avanyisiweni; lahawani, eka Vamatiko, U va hisile hinkwavo hi siku eSodoma. Hi swona sweswo. Misava ya Vamatiko yi tshwele kwalahaya, "kutani swingaleswi swa ha tava tano ni hi nkarhi lowu N'wana wa munhu a nga ta hlavuteriwa." A ka hari na mati, kambe kutava ndzilo sweswi. Yesu u swi hlaye kusuka eka Genesa 23 ya leyi hi nga hlaya yona, loko A hlaya hi ta Sodoma.

190 Sweswi, ha amukela xiyimo xa leswi a ku vulavuriwa hi swona, hi xiyimo xa misava eSodoma, Vusodoma, xiyimo xa Sodoma. Hina, un'wana na un'wana wa hina, hi ta ku, "amen" eka sweswo. Hi pfumela sweswo. Hi swona.

191 Ni xiyimo xa ximoya xa Laodekiya, kereke ya ntumbuluko, hi ta ku "amen" eka sweswo, kutani hi amukela swikombiso swa vona. Ha swi tiva leswaku xikombiso xin'wana na xin'wana xi kwalahaya. Kereke yi le ka Laodekiya. Ha swi tiva sweswo. [Nhlengeletano yi ku, "Amen."—Muhleri.]

192 Ha swi tiva leswaku misava yi le ka xiyimo xa Sodoma. A hi swona xana? [Nhlengeletano yi ku, “Amen.”—Muhleri.] Hi ta swi amukela sweswo.

193 Kambe hi ri yini hi swikombiso swa Abraham, loyi a yimele n’wana wa xitshembhiso? Yaloye a ri un’wana.

194 Tsundzukani, leswaku a kuri na Sodoma endzhaku lahaya; a va ri na murhumiwa wa vona. Na Abraham a ri na murhumiwa wa yena.

195 Abraham a rindzerile, siku na siku, leswaku, minkarhi hinkwayo a wu ri nchumu lowu wu nga kotekiki ku humelela. “Sarah, a ri ni makume nkaye, kasi yena a ri na dzana.” Ku ya hi xitshembhiso xa Xikwembu, a languterile. Exikarhi ka ku sandziwa hinkwako, a langutele n’wana ya loye.

196 Swingaleswi swi tano nile ka mupfumeri wa ntiyiso u rindzerile N’wana ya loye wa xitshembhiso ku vuya! Xiyisisani, ntsena loko n’wana a nge si fika, a kuri na sayini leyi a nyikiweke yona. A hi sayini ya ku vuya ka N’wana leswaku a ta hlavuteriwa eka Mbewu ya Vuhosi bya Abraham lebyi byi yimeleke ku ta ka N’wana wa Vuhosi, ku kotisa loko a ta eka tatana wa Abraham eka n’wana wa ntumbuluko? [Nhlengeletano yi ku, “Amen.”—Muhleri.] Hi swona sweswo? [“Amen.”] Yesu u vule tano, lahawani eka Mukwetsimi Luka 17:30, “Ku nga si fika nkarhi lowu, leswaku, N’wana wa munhu u ta hlavuteriwa tani hiloko A swi endlile enkarhini wa Sodoma, ri nga si lovisiwa Sodoma.” Sweswi hi langutele sayini.

197 Sweswi a hi tekeni swiyimo swa nkarhi lowu a swi ri xiswona eSodoma. Xiyisisani, hinkwavo va tlhelerile eka xiyimo xa Vusodoma, misava.

198 Ndzi ehlekata leswaku un’wana wa vafambisi va tifilimi u vekele xifaniso, ku nga ri khale ngopfu, ndzi fanele ku xi vona, xexo a kuri, *Sodoma*. Loko mo tshika mi xi vonile a kuna xin’wana kwalaho handle ka sweswo, mi xi languta. A kuri xifaniso xa kahle xa United States namuntlha, Hollywood, ntsena swa fana; ma ambelelo yo fana ni hinkwaswo leswi va swi endleke tani hiloko swi ri kahle kwalaho; swidakwa leswikulu swa swinwi ni swin’wana, vanhu va vukhongereri bya mikhuva, lava tivulaka va khongereri.

199 Xiyisisani, nakona Sodoma na rona a ri ri na mbhoni, kutani a kuri nakulorhi hi vito ra Lota, loyi a ri ntukulu eka—eka Abraham.

200 Sweswi, Abraham a nga rhelelanga a ya eSodoma, yena ni ntlawa wa yena. A ri ni ntlawa wa yena lowukulu, lowu a wu ringanela ku lwa ni tihosi ta khume mbirhi ni mavuthu ya tona. Swingaleswi, A ri ni ntlawa wukulu. Nakona a tshamile ehansi lahaya ehansi ka murhi wa nkuhlu, siku rin’wana, loko

hinkwaswo swi nga ha n’wi fambeli kahle; a ku nga ri na loyi a ri na mhaka na yena, kambe a ha khomelele eka xitshembhiso xexiya.

Langutisani sweswi, swinene, hi nga se pfala.

201 Loko a ha tshame kwalahaya, ku fike vavanuna vanharhu, va ta laha a ri kona. Vambirhi eka vona va kongomile eSodoma kutani va ya chumayela Evhangelu eka vona, leswaku va huma, eka Lota. Xana a hi swona? [Nhlengeletano yi ku, “Amen.”—Muhleri.] Kambe Un’we u sale na Abraham. Xiyisisani, Loyi a sele na Abraham a kuri Xikwembu hi Xoxe. Lava mbirhi a va ri Tintsumi ta varhumiwa.

202 Sweswi, ehansi eSodoma, a va endlanga masingita, ntsena a vo va endla mabofu. Kutani ku chumayela ka Evhangelu minkarhi hinkwayo ku va endla mabofu.

203 Sweswi langutani eka ntshamiseko wa siku lero. Ku ni kereke ya ntumbuluko. Minkarhi hinkwayo ku ni swinharhu, tani hilaha ndzi vuleke vusiku bya tolo, Xikwembu xi yimeriwile. A kuri na Masodoma; Valota; ni Vaabraham. Swa ha ri eka xiyimo xexo madyambu lawa, misava ya ha tshamise xisweswo.

204 Mi nge ndzi mi vutisa swin’wana. Langutani eka ntshamiseko lowu sweswi. Abraham u vule Munhu loyi a vulavula na yena leswaku i, “Elohim.” Rito ra Xiheveru *Elohim* swivula “la enerisaka eka hinkwaswo, Yena La nga riki na Makumu,” Elohim, Xikwembu hi Xoxe!

205 Ekusunguleni, Genesa 1, yi ri, “Ekusunguleni Xikwembu. . .” Tekani rito ra Xiheveru kwalaho, ku nga hava, kumbe rito ra Xigriki, kumbexani, “Ekusunguleni *Elohim* u tumbuluxile matilo ni misava.”

206 Lahawani, Yena, eka Genesa, kwalomu ka 22 lahawani, U ri nakambe, kumbe—kumbe kwalomu ka 20, U teri, kutani u vitanile hi vito ra Wanuna loyi “Elohim.” Hikokwalaho ka yini a swi endlile? Xikwembu, xi tikombisile enyameni ya munhu, loyi a tshameke na Abraham a dya sangweji ya rhole, a nwa ni masi nyana, a dya na xinkwa nyana. Xikwembu hi Xoxe, Xi tlhela xi nyamalala emahlweni ka Abraham.

207 Kambe Xi n’wi nyikile sayini. Langutani. Kutani sayini ya leyo a yi ri loko Xi tava xi tekile nhlana wa Xona wu kongomana ni tende.

208 Kutani tsundzukani, Abraham, vito ra yena a ri Abram masiku nyana ku nga si humelela sweswo, kutani Sarah a ri Sarai ku nga se humelela sweswo; S-a-r-a-i kutani kuva S-a-r-a-h, na A-b-r-a-m a va A-b-r-a-h-a-m. *Abraham* swivula “tata wa matiko.”

209 Sweswi langutisani swinene lahawani, kutani hi ta kota ku vona ntshamiseko wa awara leyi hi hanyaka eka yona sweswi,

tani hilaha Yesu a hi byeleke ku languta ntshamiseko lowu. Hi swi vonile kahle leswin'wana hinkwaswo; sweswi a hi languteni Mbewu ya vuhosi, leswaku hi wihi ntshamiseko lowu va faneleke ku wu vona.

210 Sweswi Wanuna loyi u teri, "Abraham, u kwihi nsati wa wena, Sarah?"

Kutani Abraham a ku, "U le tendeni, endzhaku ka Wena."

211 Sweswi, a nga si tshama a n'wi vona. Xana A swi tivisa ku yini leswaku vito ra yena i *Abraham*? Xana A swi tivisa ku yini leswaku vito ra yena i *S-a-r-a-h*? "Abraham, u kwihi nsati wa wena, Sarah?"

A ku, "U le tendeni, endzhaku ka Wena."

212 Kutani A ku, "Ndzi..." "Ndzi," i riviti ra ximunhu. "Ndzi ta ku endzela hi kuya hi xitshembhiso. Nsati wa wena u ta kuma n'wana ya loye. U Ndzi tshembhile, sweswi ndzi ta swiendla swi hetiseka."

213 Kutani Sarah, a ri etendeni, endzhaku, a rhiye ndleve kumbe ku yingisela, hilaha mi swi vurisaka xiswona, a yingisela a ri etendeni, a hleka a ti pfale nomu, kutani a ku, "Sweswi, mina, mukhegula wo tani hi mina, ndzi va ni ku tsaka ni hosi ya mina; na yena a dyuhaleke, swin'we, laha sweswi a nga na dzana ra malembe hi vukhale? Loko, leswi swi nga si tshama swi humelela malembe yo hlaya, malembe yo hlaya."

214 Kutani Wanuna, W-a-n-u-n-a, a tshamile kwalahaya a ri karhi a dya, hi xivumbeko xa munhu wa nyama, a nwa niku dya tani hi munhu wa ntolovelo; a ri ni ritshuri empahleni ya Yena, na ritshuri emilengeni ya Yena, kutani Abraham a ri hlantswa ri suka. Xikwembu, hi Xoxe, xihalahala, kutani Xi ku, "Hikokwalaho ka yini Sarah a hleka, endzhaku ka tende, a vula *leswi*?" A swi tiva, a tiva miehleketo ya Sarah loyi a ri etendeni, endzhaku ka Yena. Xana a hi swona? [Nhlengeletano yi ku, "Amen."—Muhleri.]

215 Sweswi, loko Mbewu ya Vuhosi ya Abraham yi ta emisaveni, hi yihi sayini leyi A yi kombaka, N'wana wa munhu. Simon u tile eka Yena siku rin'wana; a tisiwile hi Andrew. A ku, "Vito ra wena i Simon. U n'wana wa Yonasi," A ku. Wa vona, sweswo swi endlile mupfumeri a va ehandle ka yena n'winyi.

216 Filipi u sukile a ya kuma Nathaniel; a vuya, a ku, "Tana, u ta vona Wanuna Loyi hi—nga n'wi kuma; Yesu wa Nazareta, n'wana wa Yosefa."

217 A ku, "Yima nyana xinkadyana. Xana leswinene swi nga huma eka vabayizani va lava?"

A ku, "Tana, u ta vona."

218 Swingaleswi loko Filipi a fika eVukoneni bya Yesu, a ri na Nathaniel, Yesu a n'wi languta a ku, "Vonani Muisrael loyi a nga riki na xisandzu."

A ku, "Mufundhisi, xana u ndzi tive rini?"

219 A ku, "Filipi a nga se ku vitana, loko wa ha ri ehansi ka murhi, Ndzi ku vonile."

220 A ku, "Mufundhisi, Wena u N'wana wa Xikwembu. U Hosi ya Israel!"

221 Loko wansati lontsongo exihlobyeni, eka xiyimo xa yena xa vugangu, a fika, a vona xin'wana xo languteka tani hi xifaniso nyana, loko a ka mati. Yesu a rhume vadyondzisiwa va yena, ku ya xava swakudya. Loko wansati a ta ku ta ka mati, U teri, "Ndzi keli ndzi nwa, wansati."

222 A ku, "A swi tolovelekanga eka Wena kuvula sweswo. Hi avanile lahawani. Sweswi, n'wina Mayuda a mi na mhaka na hina Vasamariya; ku hava lexi hi nga xi endlaka na n'wina."

223 A ku, "Kambe, wansati, loko ngi a wu tiva Loyi u vulavulaka na yena, a wu ta kombela eka Mina mati. A ndzi ta ku nyika mati lawa u nga taka u nga tlheli u vuya u ta ka."

224 U kumile laha xiyimo xa yena a xi ri kona, leswi a swi ri xiswona. A ku, "Famba u ya teka nuna wa wena u ta na yena lahawani."

A ku, "A ndzi na nuna."

225 A ku, "U vula ntiyiso. U vile na ntlhanu wa vona, ni loyi u tshamaka na yena sweswi a hi wa wena."

226 A ku, "Nkulukumba, ndza switwisisa leswaku U muprofeta. Ha switiva leswaku loko Mesiya a ta U ta hi komba swilo leswi."

Yesu a ku, "Ndzi Yena."

227 Loko a twa sweswo, u tsutsumela emutini a fika a ku, "Tanani, mi ta vona Wanuna Loyi a ndzi byeleke swilo leswi ndzi swi endleke. Xana a hi yena Mesiya xana?"

228 Langutani, U endle leswi emahlweni ka Vayuda, ni Vasamariya, kambe kungari eka Vamatiko. Vamatiko, hina vanhu, a hi ri vahedeni hi minkarhi ya vona, matiko man'wana, ya ha beburile xigiya eminhlanini ya hina, va phahla swikwembu. A hi nga langutelanga Mesiya.

229 U humelele ntsena eka lava N'wi langutelaka, nakona ha fanela ku N'wi langutela.

230 Kambe lava tiendlaka i ngaku va N'wi languterile, kereke yona hi yoxe, loko va swi vona leswi loko swi humelela, va teri, "Hi yena javulosi. Hi Yena xingomatanda, i Beelzebab!"

231 Kambe Yesu u teri, "Xidyoho xexo va ta rivaleriwa eka xona," hikuva A nga si fa. "Kambe," u teri, "siku rin'wana

Moya wo Kwetsima wu tata wu ta endla swo fana ni leswi, loyi a nga ta vula rito rin'we ro Wu kaneta a ngaka a nga rivaleriwi." Rero i siku leri ra namuntlha, laha Rito rin'wana na rin'wana ri faneleke ku khomana. "Ku vula rito rin'we ro Wu kaneta; u ngaka u nga rivaleriwi eka misava leyi kumbe eka leyi yi nga tata."

²³² Yaleyō a yi ri Mbewu ya Vuhosi ya Abraham. Kutani Mbewu leyi ya Vuhosi ya Abraham, leyi taka hikwalaho ka ku tikombisa ka Munhu ya loye a tshameke na Abraham, yi ta eku khorwiseni leswaku ka hari Xikwembu xexiya xin'we, yi tshembhisiweke eka siku leri, "Tani hilaha a swi ri xiswona enkarhini wa Sodoma, swingaleswi swi tava tano ni hi siku leri N'wana wa munhu a nga ta vuya hi rona, loko A ta tihlavutela yena N'winyi tani hi N'wana wa munhu." Amen. Leri i siku leri Tsalwa ri faneleke ku hetiseka.

²³³ Langutani xiyimo lexi hi nga eka xona namuntlha. Langutani kereke leyi N'wana wa Xikwembu... Langutani siku leri ri kanganyisaka. Langutani hinkwaswo leswi profetiweke. Sweswi, lexi xi chavisaka, vaendzi va hina va fanele va fikile, loko kuri hi leswaku ntshamiseko wu fanele ku fana ni wale Sodoma.

²³⁴ Ku tile vanharhu va vona, vavanuna vanharhu lava rhumiweke hi le Tilweni. Hi ta swi pfumela sweswo. Vanharhu va vona; un'we u sele na Abraham. Hinkwavo va sungule kwalahaya, kambe un'we u sele na Abraham. lavan'wana va yile eSodoma. A hi swona xana? [Nhlengeletano yi ku, "Amen."—Muhleri.] Abraham rive vito leri ri ncinciweke, kusuka eka Abram kuya eka Abraham. I ntiyiso? ["Amen."]

²³⁵ Ku hava ni nkarhi na wun'we wa matimu, kereke ya misava, leyi yi nga tshama yi va ni muevhangeli loyi a nga ya eka yona, hi vito leri helelaka hi h-a-m, ku kondza ku fika siku leri, Billy G-r-a-h-a-m. A hi swona xana? [Nhlengeletano yi ku, "Amen."—Muhleri.] G-r-a-h-a-m, ntsevu wa maletere. A-b-r-a-h-a-m i nkombo wa maletere. Kambe G-r-a-h-a-m i ntsevu wa maletere, leswi yimelaka misava, munhu. Wa vona?

²³⁶ Langutani laha va yeke kona, namuntlha, i varhumiwa va vona lava humaka eTilweni.

²³⁷ Xana u kona munhu laha misaveni loyi a chumayeleke hi ku hundzuka kufana na Billy Graham xana? Xana u kona munhu la nga tshama a tekeriwa enhlokweni hi vanhu, kufana na Billy Graham? A nga vangi kona, misava hinkwayo, munhu. Oho, Billy Sunday, ni van'wana, a va ri kona kwala United States, kambe Billy Graham u tiveke misava hinkwayo. Xana ma swi vona leswaku u huwelele a ri kwihl? A ri eSodoma.

²³⁸ Kutani ku ni vandla leri ri n'wi heleketaka lahaya na kereke ya Pentekostal, ku nga Oral Roberts.

239 Kambe ntlawa wa Vahlawuriwa vona ke? Xana u muxaka wihi wa sayini va faneleke ku yi vona xana? Xana a va fanele kuva na yini xana? Haleluya! “Ku tava na ku Vonakala hinkarhi wa madyambu.” Namuntlha Tsalwa leri ri hetisekile. [Nhlengeletano yi tsaka—Muhleri.] Namuntlha xitshembhiso xa Xikwembu xi hetisekile. Ha swi tiva leswaku leswi i Ntiyiso. U kona lahawani madyambu lawa tani hi leswi A ri kona nkarhini wolowo.

240 Sweswi, ku ri chumayela, tani hilaha ndzi vuleke nkarhi lowu wu nga hundza, loko a chumayela swin’wana leswi nga Evhangelu ya Ntiyiso, kutani Xikwembu xa boheka ku swi seketela. A hi ntiyiso xana? [Nhlengeletano yi ku, “Amen.”—Muhleri.] Sweswi, loko swi ri tano, mi nge Xikwembu lexi tsaleke Rito, mi nge Xikwembu lexi endleke vuprofeta, mi nge Xikwembu lexi nga Xikwembu xa Rito, xi ta emahlweni ku ta khorwisa leswaku Xa ha ri Xikwembu.

241 Tani hilaha Eliya a gonyeke entshaveni; a langutisa, Elixa u yile a ya langutisa Eliya, a ku, “Ndzi lava matimba ya wena ha kambirhi.” Kutani nguvu leyi a yi ri eka Eliya yi wela ehenhla ka Elixa. A rhelela, a petsa nkumba walowo a fika a ba nambu, kutani a ku, “Xana xi kwihhi Xikwembu xa Eliya?” Kutani swo fana ni leswi swi nga humelela Eliya, swi humelele Elixa.

242 Nakona Evhangelu yona ya liya, Matimba ya lawaya, N’wana wa munhu yaluya wo fana ni wa tolo, wa ha ri yena namuntlha, wa ha tava yena ni hilaha ku nga heriki. Vaheveru 13:8. Ma Ri pfumela xana? [Nhlengeletano yi ku, “Amen.”—Muhleri.] Sweswi, ndza mi vutisa. Ndzi ngaka ndzi ngavi Yena, kambe U kona kwalahawani. [“Amen.”] Hina hova varhwali ntsena.

243 Van’wana va n’wina vanhu kwale handle, ku ni lava vabyaka ni lava xanisekaka, lava mi swi tivaka leswaku a ndzi mi tivi, pfumelani Xikwembu sweswi. . . loko ndzo tintsongahata swinene. N’wina mi khongela mi kombela Xikwembu.

244 A ndzo vhumba. . . A kuna khadi ra xikhongelo lahawani muakwini, kumbe ri kona? Ee, a ndzi pfumeli. . . A hi kalanga hi nyika makhadi yo khongelela. Hi tava na nhlengeletano ya xikhongelo. . . kumbe ku horisa vavabyi, ekerekeni. Kambe, mi khongela.

245 Kutani ma swi tiva leswaku a ndzi mi tivi hakunene. Wa vona, n’wina mi tiva mina, Jeffersonville! A ndzi swi lavi leswaku vanhu vale Jeffersonville va swi endla. Ndzi lava vanhu vale kule lava humaka kun’wana. Mi ta vona loko Xikwembu xa ha hlavutela! Mi vona loko A ha ri yena tolo, namuntlha, ni hilaha ku nga heriki!

246 Endlani tani hi wansati lontsongo a swi endleke. U hundzile hi le xikarhi, kutani a ku, “Ndza n’wi pfumela Wanuna loyi.” A ri na vuvabyi bya switlhandla, kutani a ku, “Loko ndzo khumba makumu ya nguvu ya Yena, ndza pfumela leswaku ndzi ta hola.” A hi swona xana?

247 Hikwalaho ka ripfumelo ra yena, siku lero, Tsalwa ri hetisekile. “U boha timbilu ta lava ti nga va tshovekela, a horisa vavabyi ni swilema.”

248 Loko a tava a khumbhile nguvu ya Yena, a suka a famba a ya tshama ehansi, U hundzulukile kutani a ku, “Xana i mani a Ndzi khumbheke?” A ta swi tivisa ku yini, exikarhi ka ntshungu walowo wa vanhu, kumbexani a wu tlula lowu hi makume nharhu ku andzisa hi lava va nga lahawani madyambu lawa, magidi ya vona? Xana U swi tivise ku yini? A ku, “Xana i mani a Ndzi khumbheke?” A ngo swivula ntsena; A swi vula hikuva swi ri ntiyiso. Kutani A ku, “Xana i mani a Ndzi khumbheke?” Hi ku hatlisa U halaharile kutani a vona wansati lontsongo, laha a tshamile kumbe a yime kona, eka xiyimo xihi kumbe xihi lexi a ri eka xona, a n’wi byela leswaku vuvabyi bya yena bya ngati byi herile.

249 Yaloye a kuri Yesu tolo. Wa hari Yena namuntlha. Ma swi pfumela sweswo xana? [Nhlengelatano yi ku, “Amen.”—Muhleri.]

250 A ndzi mi tivi; Xikwembu xa mi tiva. Kambe u ni switlhavi erimbambini ra wena, leswi swi ku karhataka. Hi swona. U tshamile kwalaho u le ku swi khongeleleni. Ndzi muluveri eka wena, nakona a hi tivani? Suka u yima, loko swi ri ntiyiso. A ndzi ku tivi. Wanuna *loyi* a nga laha khoneni, nakulorhi lontsongo. Nakambe u karhatiwa hi minkolo. Hi swona. U le ku yi khongeleleni. Nakambe u chavisiwa hi swin’wana. U ta famba u hambana na nhlengeletano, hikuva u muministara, u na switshembhiso swin’wana leswi u faneleke ku ya swi endla. Hi swona. Ahaa. Wa pfumela leswaku Xikwembu xa ku tiva? Muf. Nkul. Smith, sweswi u nga ha famba u horisiwile. Yesu Kreste u ku horisile. Famba enhlengeletanwini ya wena; nkolo wa wena wu nge he ku karhati.

Xana i mani a ku khumbheke?

251 Ku ni wanuna la tshameke endzhaku *lahaya*; wa xaniseka. U le ku xanisekeni. U ni xipfimbo ehawini ra yena ra ximatsi. A nga. . . a nga humi kona lahawani. A wu tirha emigodini. Hi swona. A hi tivani na swintsongo. Loko sweswo swi ri ntiyiso, famba fambisa voko ra wena emoyeni. Xipfimbo xi le hawini ra wena ra ximatsi, kutani u fanele u ya endliwa vuhandzuri. Xana a hi swona? A wu humi kona lahawani. U huma ehandle ka doroba. U huma eVirginia. Hi swona. Wa pfumela leswaku Xikwembu xi tiva leswi u nga xiswona xana? Nkul. Mitchell,

hi swona, ti fambeli ekaya u horile. Yesu Kreste u ku hanyisile. N’wi vutiseni! A ndzi si tshama ndzi n’wi vona, evuton’wini bya mina. A tshamile lahaya, a khongela.

Namuntlha Tsalwa leri!

²⁵² [Makwerhu Branham a hundzuluka a komba nhlana wa yena eka nhlengeletano—Muhleri.] Hi loyi manana loyi a tshameke lahawani endzhaku, endzhaku ka mina, tani hi Sarah loko a ri etendeni. U khongelela wanhwana. Suka u yima. Wanhwana a nga kona lahawani; u le kule, wanhwana loyi. Nakona u kotisa wansati loyi a yeke eka Yesu, loyi a ri ni wansati loyi a xaniseka hi madimona yo hambanana. Wansati a . . . wanhwana loyi u ni madimona. A nga kona lahawani. U le . . . U huma eN’walungu wa Carolina. Wa swi pfumela sweswo xana? Nakona walowo i ntiyiso, a hi wona xana? Mrs Orders, u nga ha ya ekaya. Loko u pfumela hi mbilu ya wena hinkwayo, u fika u kuma wanhwana wa wena ku kotisa Yesu Kreste loko a n’wi kumile eka masiku lawa ya nga hundza, a ku u horisiwile.

²⁵³ Namuntlha Tsalwa leri; xikombiso xa Sodoma, xikombiso xa Mbewu yale henhla, xikombiso xa kereke ya ntumbuluko! Namuntlha Tsalwa leri ri hetisekile exikarhini ka n’wina. Ma swi pfumela xana? [Nhlengeletano yi ku, “Amen.”—Muhleri.]

²⁵⁴ Mi nga N’wi amukela sweswi tani hi Muponisi, muhanyisi xana? Yimani hi milenge ya n’wina, un’wana na un’wana wa n’wina, mi ku, “Ndzi amukela ku hanyisiwa ka mina. Ndza N’wi amukela tani hi Muponisi wa mina. Ndza N’wi amukela tani hi Hosi ya mina.” Un’wana ni un’wana a yime hi milenge ya yena.


Namuntlha! Yingiselani, vanghana.

²⁵⁵ “U hlayile Tsalwa, a tlherisela Biblele eka muprista, kutani,” a ku, “mahlo ya vanhu hinkwavo a ya N’wi honokerile. Kutani A va languta, kutani a ku, ‘Namuntlha Tsalwa leri ri hetisekile.’”

²⁵⁶ Ndzi hlayile Matsalwa, ni vumbhoni bya khume mbirhi kumbe ku tlula bya leswaku hi hanya eka siku ro hetelela, rixaka leri nga ta vona Yesu Kreste loko a vuyela emisaveni. Kutani ndzi ri eka n’wina madyambu lawa, nakambe, namuntlha Tsalwa leri ri hetisekile emahlweni ya n’wina.

²⁵⁷ N’wina va le Tucson, na n’wina va le California, na n’wina va le New York, lava swi twaka hi tiqhingho, namuntlha Tsalwa leri ri hetisekile emahlweni ya n’wina.

²⁵⁸ A hi tsakeni hi tsakisisa, hikuva Vukati bya Xinyimpfana byi fikile, na Mutekiwa wa Yena . . . Mutekiwa wa Yena u tilulamisela yena N’winyi.

²⁵⁹ A hi tlakuseni mavoko ya hina hi N’wi dzunisa, n’wina vanhu hinkwerhu. Xikwembu a xi mikatekisi. [Nhlengeletano yo ya emahlweni yi tsaka niku dzunisa Xikwembu—Muhleri.] 

NAMUNTLHA TSALWA LERI RI HETISEKILE TSO65-0219
(This Day This Scripture Is Fulfilled)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Wavuntlhanu na madyambu, Nyenyenyani 19, 1965, eParkview Junior High School eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

TSONGA

©2014 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
P.O. BOX 178, SOMERSET WEST, 7129 CAPE PROVINCE,
REPUBLIC OF SOUTH AFRICA

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Xitiviso Xa Mpfumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangelu ya Yesu Krete. Buku leyi a yi xavisiwi, yi humesiwa hi xikalo lexikulu, yi vakeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberwa ku ti hlanganisa na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org